

Jesucristo Juan Ōimani Keskara

Afara afeskara ixiai anori Jesucristo Juan tāpimani

¹⁻² Efe yora mīshtichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoaifo nāmānoafo a yonoxomisfo tāpimaximākai. Askafaito nikakī Jesús āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoaifo xafakīakōi. Askaito ōikī ē kirika kenea a inōpokoaifo anori a Niospa Jesús yoia anorikōi mā tāpisharakōinō.

³ Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori ini-maxikani. Nā ē mato yoiai keskai mā samamashta iki. Ea nikasharakāfe.

Juan a ichanāmisfo anoafo siete Nios yoiti pexe ano a to kirika kenexō fomani tāpinōfo

⁴⁻⁵ Nā Asia mai anoafo a Nios Ifofaafo tii siete pexefo anoafo ē mato kirika kenexō fomai. A ē mato yoiai anori ōisharakōikāfe. Afetīama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī mātō ōiti mēra mato shināmasharapainō afanā mātō ōiti fekaxtefanōma. Nāskakē nōko Ifo Jesucristo

Niospa meka noko yoimis chanĩmakõi. Jesúsfi Niospa Fakekõifekẽ retenifo. Mã retexõ maifafiafono Apa Niospa anã otofani anã nanakama. Fato fetsa askayomisma. Nãskaxõ Apa Nios fe rafexõ a xanĩfofo maitio anoafõ ato ìkixii xanĩfokõi ixõ. Aatofi noko noikõiakĩ, ãfe imi foax noko nãxoni Satanás chaka nõko ifo inõma.

⁶ Nõ aõnoax nõ Epa Nios afe yorakõi ixõ noko yonomapaiyai keskafakĩ nõ anõ. Nõ askai afe yorakõifo ixõ nõri yora fetsafo nõ kĩfixotiro Epa Niospa noko nikai. Nãskarafoskõi nõko Ifo Jesucristo noko imai. Nãskakẽ keyokõi yorafãfe aõxõ iskafakakĩ yoipakenakafo: “Aicho, tsoa fetsakai na Jesús keskarama. Nã fisti sharafinakõia. Ares fisti nõko Ifo nĩpanaka. Ares fisti keyokõi yorafo ato ìkipakenaka,” ixõ yoipakenakafo. Askapakexapainõ.

⁷ Õikapo. Oa nai kõi keskara sharakõi nõko Ifo Jesús oaito keyokõi yorafãfe õixikani. Askatari a retenifãferi õikani, akiki rãfixikani. Oaito õikani keyokõi yorafo a Ifofamisfomafo, “¿Afeskakĩ nõ Jesús Ifofamismamẽ?” ikanax oiaxikani, shinãmitsakõixikani.

⁸ Epa Niospa yoia: “Afara onifataima ã iyopaoni. Ëfi nĩpanakakĩ. Afetĩara na nõko mai keyoai eres fisti ã ato yoitiro. Nãskaxõ ã afama mĩshti famis. Akka ã niyopaoni. Nãskatari ã nĩpanaka,” ixõ nõko Ifo Niospa yoia.

Nõko Ifo Jesucristo ãakõi oa namakẽ õiai keskara Juan õimani

⁹ Ëkĩa Juan, ã mãto ochikõi. Nãskax mãri Jesús Ifofaax mã efe yorakĩ. Askax mã aõnoax omiskõifikĩ,

mã tenemis. Nãskariai ãeri aõnoax omiskõifikĩ ã tenei. Ë Niospa meka ato yoita Jesúsnoari ã ato yoimis. Ea nikakaspakakĩ, ãto xanĩfãfe sorarofõ ea achimaxõ, fakafã nakirafe ea ato nĩchimana ãfe nãsimã, ãfe ane Patmos ano.

¹⁰ Ë mato yoinõ, ea nikakãfe. Anoxõ iskafani. A Jesús otoni penata, nomĩkonõ, Niospa Yõshi Sharapa ea ãkixõ a ea tãpimapaiyai ea õimana. Oa namakẽ nõ õimis keskara xafakĩakõi ea õimana. Askata ea kachiorixori fãsikõi oa xãaiti keskarato ea yoiaito ã nika.

¹¹ “Nã mĩ õiaifo fetsafo kenexõfe. A kirika kenexõ Jesús Ifofamisfo tii ato fomafe. A siete Nios yoiti pexe anoafõ Asia anoafõ ato fomafe, afãfe õinõfo. A Nios Ifofamisfo a pexe tii Efeso anoafõ fomata, Esmĩrnã anoafõ fomata, Pérgamo anoafõ fomata, Tiatira anoafõ fomata, Sardis anoafõ fomata, Filadelfia anoafõ fomata, Laodicea anoafõ nã mĩ õiaifo ato kirika kenexõ ato fomafe,” ea faa.

¹² Ea askafaito ã fesoakekafã ã õia tsõa ea yoimãkai ixõ. Ë õia siete oa rãpari efapa õta keskara oro ã õia.

¹³ Nãskai rãpari nakirafe feronãfake xanĩfo finakõia nia keskara ã õia. ãfe tari ãfe tae fepokõia, ãfe sĩtorari orokõi aõ nonexemea ika.

¹⁴ Askata ãfe foo oxokõi. Askatari ãfe fero oa chii keskara xafakĩakõi. (Nãskarifiakĩ xafakĩakõi Jesús noko õitiro a nõ shinãi keskara.)

¹⁵ Askatari ãfe taeri chaxasharakõia ika. ãfe mekarĩ oa oi kaya feito nõ nikamis keskarakõi.

¹⁶ ãfe põya kayakai aõri ãfe mifi kamaki siete fishi keskara ika. ãfe ana keno chainipa keskara aostamea ika. Askatari ãfe femãnã fafekõi oa xini nõ õimis keskara ika.

17 Nāskara ōi ē pakea, oa nai keskara. Ē askaito ōikī ea ramā āfe mifi kayakai aōxori. Ē askaito ea yoia iskafakī: “Rateyamafe. Ē Jesúski. Afara onifataima ē iyopaoniki. Ēfi anā nanakamaki.

18 Iskaratīari ē nia. Mē nafianixakī, iskaratīa ē nia. Ē anā nanakama. Ē anā afeska pishta nakama. Eres fisti ē ato namata, chiifā mēra ē ato potatiro a ea nikakaspamisfo.

19 Nāskakē a mī taefakī ōiafo kirikaki kenefe. Askatari na mī iskaratīa ōiaifori kirikaki kenefe. Askatari a chipo ixiaifori kenefe.

20 Ē mia yoinō afeskai siete fishimē ēfe mēke kayakai aōri; askatari afeskai siete rāpari oro keskara otamāki. Na siete fishi mī ōiai nāato noko shināmamis siete Niospa meka yoimiso Nios yoiti pexe mēranoa ichanāmisfo. Askatari nā siete rāpari keskara mī ōiai nāatori noko shināmamis siete Nios yoiti pexe mēranoax ichanāmisfo Nios Ifofakanax,” ixō ea faa.

2

Jesús a Ifofaafō Efeso anoafō ato yoini taekōifakī

1 Jesús ea yoia iskafakī: “Efeso anoxō a ea Ifofaafō a ato Niospa meka yoimisto na kirika ato anexonaito nikanōfo, iskafakī kenexōfe: ‘Ēkīa mātō Ifo Jesús keyokōi yorafo ēfe Epa Niospa meka yoimiso ē ato kexetaifaa. A ē mato yoiai anori ea nikasharakōikāfe.

2 A mā ikai keskara mē tāpia, mē mato ōi. Māfi eōxō fāsi yonosharakōimiskī. Afara fetsa afeskara afiaito mā tenekōimis. A yorafāfe afarafo chakafamisfo anorikai mā tāpipaimisma. Akiki mā inimapaimisma afara chakafaifono, nāskax

mã ato fe rafekaspamis. Yora fetsafãferi mato yoikĩ iskafakani: “Cristo ea nĩchia ã mato yoinõ,” ixõ mato yoiaifãfe, “Nõ ato nikayonõ,” ixõ mã ato nikataifaa. Fanĩrira mato yoiaito anã chanĩki yoimara mã faima mẽ mato õia mã askafaito. Anorima yoi ãa chanĩmisfo mã mã tãpia.

³ Nãskax mã eõnoax omiskõikĩ mã tenemis ea potakaspakĩ.

⁴ Mã anori shara shinãfimiskẽ ã anã meka fet-sari yoinõ. Taefakĩ mã ea noiyoopaonixakĩ anã iskaratĩa mã ea anã noisharaima. Mã mã ea shinãmaki fetsea.

⁵ Shinãsharakãfe a mã taefakĩ shinãyoopaoni anori. A ea noikĩ mã taefani keskafakĩ anã ea noikãfe. Askatari mã ranã mã nõinãyoopaoni keskakõikãfe. Akka mã ea tanaima, oa chii nokaito nõ anã kãtefatiro keskafakãfe ea shinãkĩ. Mã ea Ifofasharayamainokai chipo tsõa anã mato tanaima. Mã ichanãi ano anã tsoakai mato fe ichanãima.

⁶ Mã askafixõ afara fetsa mã shara famis. A feronãfake ãfe ane Nĩkoraita fanĩrira yoiaito nikakakĩ atirifãfe mato anoxõ nikakaxõ, afãferi chakafamisfo keskafakĩ ãri ato noikaspai. A ã noikaspai keskafakĩ mãri efeta noikaspai.

⁷ Mã pachoyakĩ ea nikakõikãfe. Niospa Yõshi Sharapa mato yoiaito nikasharakõikãfe. Satanás mato fanĩrira shinãmapaimiskĩ. A Satanás finõinĩfofã ea kachikiri fatama ea Ifofasharakõiaito, aafi Epa Nios ano ã ikimaxii efe isharpakexanõ, ” ixõ Jesús ea yoia anori Efeso anoafõ a chanĩmara faafõ ato ã kenexonõ.

Jesús Ifofaafõ Esmĩrnã anoafõ ato yoini

⁸ Anã Jesús ea yoia iskafakĩ: “A ea Ifofamisfo Esmĩrnã anoafõ a ato Niospa meka yoimis ã yoinõ

ea kirika kenexõfe iskafakĩ: ‘Ëkĩa mãto Ifo Jesús ã mato yoi mã tâpinõ. Ea nikasharakãfe. Nã afama mĩshti onifataima ã iyopaoni. Iskaratĩa ã nĩpanaka. Mẽ nayofinixakĩ ã anã nanakama. Ë mato nonori yoi iskafakĩ:

⁹ Mã omiskõiaito mẽ õi. Askatari mã afaayafoma. Mã askafiaino ã mato fe ikano, ea keskarari mã shara itiro. Mẽ tâpia matoõnoa yora fetsafãfe meka chakayoiãifãfe. “Nõ judeofo, nõ Nios Ifofamis,” ikaxõ yoiãifo afokai efe yorafoma. Afofi Satanás yorafoki.

¹⁰ Akka a inõpokoai ã mato yoinõ. Satanás ifo-faafãfe fatora fetsa fisti mato karaxa mẽra iki-maxikani mã ea shinãmakimãkai õixikakĩ. A mato mesenifaifono rateyamakãfe. Ea shinãmakitama nonori shinãkãfe iskafakĩ: “Ea retefiaifono ã meseima, ã Nios ari kai. Ëfe Ifãfe ea potanakama. Ë ãfe Ifo noikĩ finakõifafãini,” ixõ yoikãfe. Mã askax, nakẽ, ã mato ãkipakenaka mã efe ãpaxanõ.

¹¹ Mã pachoyakĩ nikasharakõikãfe Niospa Yõshi Sharapa mato yoiãito mã Jesús Ifofakĩ. Fetsa omiskõifikĩ ea shinãmakiyamaito Satanás afeskafatiroma. Nãskax naax a omiskõipakenakafo mẽra katiroma,” ixõ anori Jesús ea yoiã a Ifofaafo Esmĩrnã anoãfo ã ato kenexonõ.

Jesús Pérgamo anoãfo a chanĩmara faãfo ato yoini

¹² Anã Jesús ea yoiã iskafakĩ: “A ea Ifofamisfo Pérgamo anoãfo a ato Niospa meka yoimis a ã yoipaiyai anori ã yoinõ ea kirika kenexõfe tâpinõfo. Iskafakĩ kenefe: ‘Ëkĩa mãto Ifo Jesús ã mato yoi mã tâpinõ. Ëfe meka oa keno chainipa

takairafe ikikōiai keskaraxō, ěfe mekapas a ea noikaspaifo tii ě ato chakafatiro kopikī.

¹³ Mē tāpia a pexe rasi Pérgamo ano mā ika. A Pérgamo anoafāfe Satanás nikakōikani. Askaito ōi mā mesemisma, ea Ifosharafai. “Jesús nōko Ifokōi,” ixō mā ato yoimis. A ea Ifofamis fetsa āfe ane Antipas eōnoa ato yoimis ōikī mā reteafo noikaspakakī. Mā reteaifāfe ōifiax mā atoki meseima, mā ea chai faama. Māto ōiti mēra mā shināsharakōi. “Noko retefiaifonokai nōko Ifo Jesús nō chai faima,” ixō mā yoimis. Anori mā shināi sharakōi.

¹⁴⁻¹⁵ Akka nāno afara fetsa a sharama ě mato yoipai. Fatora mā fetsa a Balaam afara chaka yoini keskara mā shināmakikaspai. Akka taeyoi xanīfo Balac israelifo chakana famapaini. Nāskaxō Balaam yōkani: “¿Afeskaxō mī kaifo ě ato chakana famatiromē?” faito, Balaam kemani iskafakī: “Mī ato yoitiro mī fista mēra ato ikikixiki. Nā mā akai keskarari akairi anōfo. Nā nōko niosra ixō afara onifaxō a mā piyai mā ināmis. Nā israelifāfe pikanax chakananōfo māto fista mēranoax. Askatari āto āfima fe ikanax chakananōfo,” fani. Iskaratīari nāskaraforti mā fisti rasi chakanafō nā Nicolaitafāfe ato afara chaka tāpimanaifo keskara ikafo.

¹⁶ Nāskakē anā iskaratīa askafayamakāfe. Nios Ifokāfe, anā shinākāfe. Māto chaka xatekāfe shināmitsayanā. Akka mā chaka xateyamaito, ě matoki samamashta nokoxō ěfe mekapa ě mato kopikī chakafatiro mā omiskōinō. Ěfe mekafi oa keno ikiai keskarakōikī.

¹⁷ Mā pachoyaki ea nikakāfe. Niospa Yōshi Sharapa eōnoa mato yoiaito, nikasharakāfe.

Satanás mato chakafamapai. Fětsa Satanás nikayamaxō ea kachikiri faamano, nã ě kexesharaxii nã ěfe Epa israelifo kexesharani keskafakī. Shinākapo. Epa Niospa israelifāfe āto xinifo a piaifo ato ināni fonāikaifāfe afaa piamaifāfe Epa Niospa nai mēraxō ato pōtani oa misi keskarrafo āfe ane mǎnã nã pinōfo ato pōtapaoni pena tii ato noikī. Nāskafakīri nã ea chanīmara faafo ea Ifo sharakōi faifo ě ato ināxii ěfe Yōshi Shara isharapakexanōfo. Ea ōiyamafiaifono pena tii ě āto ōiti xafasharakōi faxotiro. Askatari mǎ ea Ifo sharafaifono isharakōiyanã mǎ ea chanīmara faino, akka ě mato ane fetsafaxōi tsōa tāpimisma, nã fi ai fistichi tāpitiro. Tokiri oxosharakōikī nã tokiriki mǎ mǎto ane kenea mǎto ane fena ě mato ināxii. Nāskakē ea tāpisharakōixikani. Mǎ ōitisharayakōi ixii, ” ixō Jesús anori ea yoia a chanīmara faafo Pérgamo anoafō ě ato kenexonō.

Jesús a Tiatira anoafō a Ifofamisfo ato yoini

¹⁸ Anã Jesús ea yoikī iskafaa: “Ea Ifofaafō Tiatira anoafō Niospa meka ato yoimis a ě yoipaiyai anori ě yoinō ea kirika kenexōfe iskafakī: ‘Ĕkĩa ě mǎto Ifo Jesús ě mato yoisharapai mǎ tāpinō. Ĕfe fero oa chii xoisai keskara. Nāskakē ě mato tāpikōia. Ĕfe taeri nã keno fakka fakka ikai keskara. Nāskakē ě mato yoikī iskafai:

¹⁹ “Mē mato tāpia, nã mǎ afara shara famis. Mǎ nōinākōi. Askatari mǎ ea chanīmara faxō mǎ ea Ifokōi famis. Nāskakē fetsafori mǎ noisharakōimis ato kexesharayanã. Mǎ omiskōifikī eōxō mǎ tenekōimis. Mǎ ea chanīmara fakī taefanitĩa mǎ

fetsafo sharafamis. Nāskakē iskaratīari mā ato noisharataifaa.

²⁰ Mā mā askafimisno afara fetsa ē mato yoinō a ē fichipaiyaima mā anā fichipainōma. Akka kēro fisti mato fe ichanāxō, 'Ē Niospa meka ē mato yoinō, ea nikakāfe,' ixō mato yoipaikī, ēfe mekakōi mato yoima. Nā kēro Jezabel fanīrira mato yoikī āa mato pāramis. Mā Jesús Ifofiamiskē mato pāramis iskafakī: 'Māto āfimafo chotakāfe; kērofāferi māto fenemafo chotamakāfe,' mato famis. Askatari mato yoimis iskafakī: 'Afara fetsa yora fakaxō, nā nōko niosra ixō, a mā piāi ispaxō nōko nios nō ināira ixō, ano fisti ichanāxō, mā pitiro,' ixō na kēro Jezabel mato yoikī mato pāramis.

²¹ A kēromā fanīrira mato yoimis mē yoitaifamis anā chakafanōma. Ē yoifiaitokai āfe chaka xatepaima.

²² Ē yoifiaino ea nikayamaito ōikī ē isinī imaxii rakatsax omiskōinō. Askata a fetsafori a keskara a sharashināifoma āto chaka xateyamaifāfe ē ato omiskōimani.

²³ A kēromā shināi keskarari shināifo ē ato re-texii. Ē askafaito, ōikani a ea Ifofamisfo mai fetsafo arixō tāpitirofo ē keyokōi yorafo ē tāpisharakōia. Māto ōitinī a mā shināi anori mē tāpikōia. Tsōakai afaa pishta ekeki onetiroma. Ē keyokōi tāpikōia. Nāskakē mā afarafo shara famis ē mato shara faxii kopifakī. Akka a afarafo chakafamisfo ē ato omiskōimaxii kopikiri.

²⁴ Efe yora mīshtichi Tiatira anoafāfe, mā atiri nā kēromā mato fanīrira yoipaiyai anori mā nikamisma. Satanás ato tāpimamis keskara mā anori shināpaima. Askara shara. Nāskakē ē anā

mato afaa fetsa yoima.

²⁵ Nāskakē ē anā fistiri mato yoi. Na eōnoa mā tāpimis anori shināmakiyamakāfe. Ē mato ifiyoai mā eōnoa tāpimis anori shināmakipaiyamakāfe.

²⁶⁻²⁸ Fētsa Satanás finōkōixō, ea fisti Ifokōifaax mā naax nā efe nīpanaka. Ē ato xanīfo imaxii. Epa Niospa ea xanīfokōi ima keyokōi ē ato īkinō. Nāskarifikā ē ato xanīfo imatiro efeta na maitio anoafō ato īkinōfo, mitsisipakōixō. Akka a fetsafāfe ēfe meka shara nikakaspafāfe nō ato omiskōimaxii. Oa nō kesho kerexkai nō yamī moshaino moshitiro keskara afeskaxō nō anā shara fatiroma. Nāskarifikā nā nikayospamisfo nō ato omiskōimanaitīa tsoa pishta ato timamatiroma nanōfoma. Mā penaino, fishifā fisti fafeaito, keyokōichi yorafāfe ōtirofo. Aa keskara ē anā oxii ea ōisharanōfo. Ē anā nokoxō, ē ato yoixii nā ea Ifofamisfo efe isharapakexanōfo.

²⁹ Mā pachoyakī ea nikasharakāfe. Niospa Yōshi Sharapa mato yoiai keskara nikasharakāfe,” ” ixō Jesús anori ea yoia a Ifofaafō Tiatira anoafō ē ato kenexonō.

3

Jesús Sardis anoafō a chanīmara faafō yoini

¹ Askata anā Jesús ea yoia iskafakī: “A ea Ifofamisfo Sardis anoafō a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa māto Ifo Jesús ē mato yoi mā tāpinō. Niospa Yōshi Shara efe ika. Ēfi Nios yoimisfāfe āto xanīfokōiki. Ē mato yoi iskafakī: Mā ika keskara mē tāpimis. Yorafāfe matoōnoa iskafakī

yoimisfo: “Nafo shara ikafo. Na Sardis anoafāfe mā Jesús Ifofakōinafo,” ixō matoōnoa yoimisfo. Mā isharamis keskara ōikani. Māri shināmis iskafakī: “Nō shara ikara” ifiax mā shara ikama. Mā ea Ifofasharakōiama.

² Akka mā mā ea shināmakia. Askakakīma, anā a mā shināyopaoni anori shinākāfe. Mē tāpia Epa Niospa mato imapaiyai keskara mā isharakōiama. Ē mato yoiai keskara mā akama. Mā eōxō asharayopaoni anā iskaratīa mā anā askafaima. Mā ea shināmakipai. Nāskakē afianā ea shināsharainīfofākāfe.

³ Nā mā ēfe meka mātō ōiti mēra mā shināyopaoni keskafakī anā shinākāfe. A mā chakafamis keskara shinākakima; ea Ifo shara fakāfe. Akka mā ea shināyamaito ē matoki samama nokorisatiro mato omiskōimaxiki. Oa yometso tsōa tāpiamano āto pexe mēra ikirisatiro keskai, ē matoki nokorisataxii mato omiskōimaxiki.

⁴ Askafiax a mato fe ichanāmisfo fisti rasi a Sardis ano ikafāfe chakafamisfoma. Nōko rapati choshtakōi nō pekaxō fatiro fetsa fena shara safexiki. Nāskafakīri atirito mā chaka shināpaoni keskara mā anā shināima, mā mā pota. Nāskaxō mēstekōi mā eōnoa shināi. Nāskaxō rapati fenasharakōi keskara ē mato ōitiro. Mā askano, mā ea ano nokoaito ē mato rapati oxokōi sharakōi ināxii mā efe ĩpaxanō. Mā isharakōimixakī mā efe rafepakenaka. Nā ē keskara shara ixikāki.

⁵ Tsoa ēfe meka shināmakitama ea Ifofakaxō, eōxō Satanás finōkanax afo efe isharakōipakenakafo. Afori ē ato rapati oxokōi sharakōi ināxii. Askaifāferi ēfe Epa Niospa a ea Ifofafo tii āto ane tii kirikaki kenea. Nāskaxō āto ane kenea

kirikaki a ea Ifofaifāfe tāpinōfo efe nīpaxakāki. Askaifāfe ē āto ane soanakama. Epa Nios feta āfe ājirifāfe ōiaifono ē ato yoixii iskafakī: “Nafofi efe yorafokī,” ixō ē ato yoixii.

⁶ Mā pachoyakī ea nikasharakāfe. Niospa Yōshi Sharaōxō eōnoa a ea Ifofaafāfe yoiaito nikasharakōikāfe,’ ” ixō anori ea Jesús yoia a Ifofaafō Sardis anoafō ē ato kenexonō.

Jesús Filadelfia anoafō a chanīmara faafō yoini

⁷ Askata anā Jesús ea yoia iskafakī: “A ea Ifofaafō Filadelfia anoafō a ato Niospa meka yoimis a ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Ē afaa pishta chakafamisma. Ē sharafīnakōia. Ēfe meka chanīmakōi. Nā fichipaiyai afama mīshti sharafo āfe pexe ano fapaoni, xanīfo David. Akka āfe pexe fepoti chamisyano toa ikitiroma ipaoni, chamis-maisax. Akka ato ikimanaino ikitirofo. Akka ato ikimayamaino toa ikitiroma. Nāskarari mā Nios ano ikipai mā ikitiroma ē mato ikimayamaino ēmāi chamis keskaraxō. Akka ē mato ikimanaino mā ikitiro Nios ano. Akka fetsafāfe ikikāfe mato faifono mā Nios ano ikitiroma. Eres fistichi ē mato ikimatiro.

⁸ A mā imis keskara mē tāpia. Mā yora ichapayamaflaxō mā shināsharakōimis. A ē yoimis keskara mā ato tāpimatiro a mā amis keskara eōnoa. A ē yoimis anori tsōa mato xītitiroma. Yora fetsafāfe mato yoiaifo mā metsanima. Mato askafafiaifono ēfe meka mā shināmakimisma. “Na Jesús nōko Ifo,” mā ea famis.

⁹ Fetsafāfe chanīkakī mato yoimisfo iskafakī: “Nō judeofo,” ixō mato yoimisfo. Afokai Niospa

afe yorafoma, Epa Nios chanĩmara faxoma. Afãfe Satanás ifofamisfo. Nãskakẽ ẽfe Epa fe nõ ãto kaifoma. Afofi ãa chanĩmisfo. Shinãkãfe. Nã yorafo ẽ ato yoimaxii iskafakĩ yoinõfo: “Nõkai shara shinãima. Nõ afama. Chanĩma, Niospa ãfe Fake mato noisharakõimis,” ratokonõ mai chachikaxõ iskafakĩ mato yoixikani.

10 A ẽ mato yoimis anori mã isharakõia omiskõifikĩ mã tenekõimis ẽfe meka nikakatsaxakĩ. Mã eõnoax omiskõifikĩ mã tenekõimis. Nãskakẽ mã ea shinãmakimismano ẽ mato kexesharaxii a omiskõiai nokoaino nã maitio. Keyokõi omiskõixikani ea Ifofayamakanax.

11 Ẽ anã samama oxii matoki. Ea shinãmakiyamakãfe. Mã ea Ifofakĩ ea chaifayamakãfe. Mã ea chaifayamaino eõxõ Epa Niospa mato inãpaiyai keskara mato inãi fetsafãfe finõfoma.

12 Fetsa omiskõikĩ ẽfe meka shinãmakitama tenekõifai ea Ifo sharakõi faxõ ato Satanás finõkõia. Nãskakẽ a ẽfe Epa Nios ika ano, ẽ ato imasharapakenaka. Anoax anã faki fonakafoma. Nãskakẽ ẽ afo tãpimaxii afomãi Epa Niospa yorafokẽ. Askaxõ ẽ ato yoixii iskafakĩ: “Nono Epa Nios ikano, nofe mã ipanaka,” ẽ ato faxii. A Niospa yorafo, judeofo, Jerusalén ano ipaonifo. Akka iskaratĩa Epa Nios ika ari Jerusalén fena. Jerusalén fena nai mẽra. Nai mẽra ifiax, chipo nãmã fotoxii. Akka fetsafo ea shinãmakikanaxma afo ano ipanakafo. Nãskakẽ fotoxõ ẽfe Epa ane ẽ atoki nẽtaxii. Askatari Jerusalén fenapa aneri ẽ atoki nẽtaxii. Askatari ẽfe ane fenari tsõa nikayomisma ẽ atoki nẽtaxii keyokõichi tãpinõfo ẽ ãto Ifokẽ.

13 Mā pachoyakī ea nikasharakōikāfe. A Niospa Yōshi Sharapa ato shināmanaino yoiiaifo anori nikasharakōikāfe,’ ” ixō Jesús ea anori yoiia a Ifo-faafu Filadelfia anoafu ē ato kenexonō.

Jesús Laodicea anoafu a chanīmara faafu ato yoini

14 Askata anā Jesús ea yoiia iskafakī: “A ea Ifo-faafu Laodicea anoafu a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Epa Niospa ea amapaiyai keskara ē fakatsaxakī āfe meka yoinō. Epa Niospa yoipaiyai keskara ē keyokōi yoimis. Ē chanīkima yoimis. Epa Niospa onifani tii keyokōi ēfi āto xanīfokōikī. Ē mato iskafakī yoi:

15-16 Mā amis keskara mē tāpia. Ea kachikiri fayamakaxō akka askafixō ē mato amapaiyai keskara mā fichipaikōiama. Askara sharama. Afara matsishara nō nīskakī nō inimayanā nō ayatiro. Askatari afara xana shara mā matsikē nō inimayanā ayatiro. Askafixokai afara katsa nō inimayanā ayatiroma. Katsa meei nō anāpaketiro. Nāskarifiāi ranāri yorafo afara xana keskarafo. Ea Ifo sharakōi faafu. Akka ranāri afara matsi keskarafo. Ēfe meka tāpisharafoma. Ē atoōnoax rafa nā ikōini. Askafiāxkai mā kai xana yafi matsi keskarama. Mā katsa keskara. Afara katsa meekī nō anāpaketiro keskara ēri mato askafai. Nāskakē ē mato potaxii oa ē anāpakeai keskafakī.

17 Akka mā yoimis iskafakī: “Ē afara ichapaya. Ē afaa yopaima. Ē Niospa mekari tāpifinakōia,” ixō, anori mā yoifiax mā tāpiama mā chaka imis.

Ooa. Ea mā yopafikī mā kakapaimis. Niospa āfe Yōshi Sharapa mato imapaiyai keskara mā ikama. Mā katsa keskarakī. Mā imis keskara mē tāpia. Akka ēkai askara fichipaima. Askafixō ē matoōnoa shināi keskara māakai tāpiama. Mā nā fē_{xo} keskarafo. Fē_{xo} afara ōtiriroma. Nāskarifiyai māri ēfe mekakōi nikasharamisma. Mā yora chitoria keskarafo. Akka mā tāpiama mā chitoria keskara. Yora chitoriato rapati yopai chitoria ixikima. Nāskarifiakī mā ea yopaima keskara ea yopafikī.

18 Akka ē mato yoisharapai mā afara chakafamis keskara mā anā anōma. Ea yōkakāfe ē mato tāpimanō afeskax mā ea keskara itiromākī. Eres fisti ē mato imasharatiro. Akka mā chitoria keskara. Akka ē mato rapati safemasharatiro mā anā rāfinōma. Akka rapati ē mato yoitamaroko mā afara chakafamis ē mato yoi. Akka ē māto ōiti fetsafaxotiro ea keskara shara mā inō. Akka a afara mā chakafamis ē xafakīa ōia. Mā fē_{xo} keskarakōi imis. Nāskakē ea yōkakāfe ē mato sharafanō, ēfe meka ē mato tāpimasharanō.

19 Akka ē mato noiyamakī ē anori mato yoikeranama. Askatamaroko ē mato keyokōi noikōi. Nāskakē ē mato omiskōimatiro tāpimākī mā chaka xatenō. Nāskaxō nāfori ē ato yoisharapai ea Ifo shara fanōfo. Akka a mā chaka shināmis keskara anā shināyamakāfe. Iskaratīa ēfe meka nikakōikāfe ē mato yoiai keskara axikakī māto chaka xatekāfe.

20 Shinākapo efe yora mīshtichi. Akka a yora pexe mēra ikipaikī ikisi pexe ifo kenatoshitiro pexe ifāfe ikimanō. Nāskarifiyai ē mato ano nokoxō mato yoikī iskafaxii: “Ē mefe rafepai,” ixō ē mato yoimis.

Fētsa āfe shinā mēraxō ea nikaxō ea yoi: “Ifo, emēra ikife. Ē mia fichipai,” ixō anori yoiaito ē a mēra ikiax ē afe rafei. Ari efe rafei.

²¹ Fētsa afara chakafakī xatexō ea Ifosharafai nā ēfe Epa Nios ika ano efe ipasharatiro. Nāato Satanás finōa. Ēfi xanīfokōikī ari efe xanīfo itiro. Ē Satanás yafi niafaka chakafo finōkōia. Ēfe Epa Nios ika ano afe xanīfokōi ē ika. Nāskarifiai fētsa āfe chaka kachikiri fakī, ea Ifosharafaxii ē ika anoax ari efe xanīfo ipaxatiro.

²² Mā pachoyakī ea nikakāfe. Niospa Yōshi Sharapa ea yoiiai keskara nikasharakāfe,’ ” ixō ea anori Jesús yoiia a Ifofaafō Laodicea anoafō ē ato kenexonō.

4

¹ Akka nā ea taefakī yoiia, mē kenekī mitoano, ea anā yoiaito ē nika. Ea iskafaito ē anā ōia nai mēraxō oa pexe fepoti fepekemea keskaraxō. Ē nika afia ē nika keskara xāaiti āfe oi efapa keskarato ea yoiia anā ea iskafakī: “Niri ekeki māpeferafe,” ea faa. Oa namakē ōia keskara ē ōia ea iskafaito: “Nafō ē mia ispanō nafō afarafo chipo ixiaifo ē mia ispanō,” ea faa.

² Ea askafaito samama Niospa Yōshi Sharapa ea ōimana āfe tsaoti efapa sharakōi ea ōimana a xanīfāfe tsaoti ano tsaokē ē ōia.

³ A ē ōimismafo ē ōia sharakōifo. Nāskakē ē tāpia. Nioskōiromē ē faa. Askaito ē ōia fafesharakōiatio. Iskara ē ōia. Tokiri rafe āto ane jaspe fe cornālinā nā rafesharakōi fakka fakka sakōini. Nāskara āfe femānā ē ōia. A āfe tsaoti ano oa nāfa fai nana keskara ē ōia fafesharakōiatio.

⁴ Nā nōko Ifo tsaosa ano a kematai veinticuatro tsaotifo ē ōia. A tsaoti kamaki feronāfakefo tsaosafo ikafo. Nā feronāfakefo Jesús Ifofamisfo ikafo. Afāfe nā ato chanīmara faifo ato kexemisfo ipaonifo. Āto rapati oxo sharakōifo māmāi ato Niospa āfe chaka soaxonikē. Askatari xanīfāfe maiti keskara oro sharakōi safeafo ika.

⁵ A āfe tsaoti anoax kana peitaitani oa kana piishikai keskara a mēranoa ē nika. A fesoa anori siete rāpari xofisaito ē ōia. A ē ōiaino Epa Niospa ea shināmana iskafakī: “A Epa Nios tsaosano rāpari otaito ē ōia keskara, nāskarifikī Epa Niospa āfe Yōshi Shara nokoki nīchiarokomē nofe rafenō,” ixō ē shinā.

⁶ Askatari a fesoa anori oa fakafā keskara fakka fakka ikaito ē ōia, oke mēra xafakīakōi ika. Askatari a nōko Ifāfe āfe tsaoti ano a onifanifo cuatro ano niafo ika. Askai fero ichapayafo. Takairafe fero neeafo.

⁷ Oa poomā femānā keskara fetsa ita, fetsari oa fakka fene femānā keskara ita, fetsari oa yōra femānā keskara ita, fetsari oa tete yoyai keskara ika.

⁸ Askakani āto pei ichapa seis ika, fisti rasi pei ichapayafo. Askai āto fero rasi ato neei fetsea ika. Penachāi fanāita, fakishchāiri fanāiki xatepak-enakafoma. Fanāiyanā iskafakani:

Sharafinakōia, sharafinakōia, sharafinakōia, nōko Nios sharafinakōi. Nōko Niospa afama mīshti famis nā apaiyaifo. Epa Nios niy-opaofinixakī, nāskakē iskaratīa nia. Askatari Epa Nios afeska pishta nakama, ikax fanāikaifo.

⁹⁻¹⁰ Nāskakē aōnoax fanāikafo iskakani: “Epa

Niosi, mĩ fisti nõko Ifo. Fato fetsakai na mĩ ikai keskarama. Mĩfi nĩsharapakenakaki. Mĩ sharakõi. Mĩ afaa pishta chakafamisma. Mĩ askaito nõ mia Ifofasharakõi. Aicho Epa Niosi. Fato fetsakai mia keskarama,” ixõ Nios fanãkafo. Mã askafono nã Jesús Ifofamisfo veinticuatro xanĩfofo nõko Ifo Nios ãfe tsaotiki tsaono a nãmã feopakefofãnafo. Feopakefofãkata, ãto maiti tsekakata feofafo Nios nãmã mãmã askafakatsaxakakĩ. Nãskaxõ yoiafo iskafakakĩ: “Nõko Ifo Nios mĩ noko maiti inã keskari fakĩ nõri miari mini. Mĩ noko inãfikẽ nõ mia fãsi noikĩ na maitifo nõ mia mini. Meres fisti mĩ noko ìkitiro. Mĩ noko ifimis. Akka mĩ nõko Ifokõi itiro.

¹¹ Mĩ afaa chakafatamaroko mĩ sharakõifamis. Akka mĩõnoa fisti nõ yoitiro iskafakĩ:

Mĩ nõko Ifokõi. Mĩ nõko Nios. Tsoa fetsakai mia keskarama shara. Mĩ isharapakenaka. Mĩkai afaa chakafamisma. Nãskakẽ nõ mia fãsi noi. Mĩ shinãmãs mĩ afama mĩshti fatiro. Mĩ keyokõi onifani. Mĩ apaiyai keskara mĩ keyokõi onifani ato nimapakexakĩ,”

ixõ nã Jesús Ifofamisfãfe veinticuatro xanĩfofofãfe yoimisfo.

5

Jesús kirika katarama tsoamaxõ ato yoiyoni afeskaximãkai chipo

¹ Askata ã anã õia oa ãfe namapa õia keskara nã ã mato yoinõ. Nã mifi kayakai aõri nõko Ifo Nios tsaono ã õia kirika katarama takai rafe kenea ã õia, siete taxtati aõ neekẽ.

² Niospa ãjiri finasharakõia ã õia. Fãsikõi mekayanã iskafakĩ yoia: “Na kirika taxtatinĩ

taxta afeskaxō tsōa ōitiroma. Nā xanīfo afaa chakafamisma fistichi fēpetiro ōixii. ¿Fato xanīfāfe afaa chakafamismato fēpetiromē nō ōinō?” ixō yoia.

³ Askafixō tsōa fēpetiroma nai mēranoa ikafāferi fēpetirofoma. Askatari a nāmā ikafāferi, Niospa ājirifāferi fēpetirofoma a mēra ōixikakī.

⁴ Nāskakē ē oiai finakōiyanā iskafakī yoia: “¡Ooa! Xanīfo afaa chakafamisma tsōa fichiama na kirika noko fēpexopanā a mēra nō ōipanā,” ixō ē shinā.

⁵ Askata nā veinticuatro xanīfofōfāfe Jesús Ifofamis fētsa ea iskafaa: “Oiyamafe. Ōipo. Nōko Ifo oa ono nia. Cristo fisti nōko xanīfo finakōi. Afama mīshti atiro. Tsoa a keskarakōima. Nōko xinifāfe āto xanīfo ipaoni David āfe fena Jesús. David xanīfo finakōia ipaofinikē, Jesús finōkōia. Keyokōi ato finōa. Satanás finōta, a xanīfo fetsafori ato finōkōia Jesús. Iskaratīa nono Epa Nios fe ika. Nāskakē na siete taxtati Jesús noko fēpexotiro nā kirika nō ōinō. Nāskakē anā oiyamafe,” ea faa.

⁶ Nāskakē nānoa ovejanā fake ē ōia āfe māxo sieteya, āfe ferori nāskara ika. Reteafo keskarafix Niospa tsaoti ano nia ika. Nānoa nā Niospa onifani cuatrofo feta a veinticuatro Nios Ifofaafo xanīfofōfāfe foaketefayakenafo ika. Tsoa fetsakai a keskarama. Nāato afama mīshti fatiro. Nā fero sietefāfe noko shināmani Niospa āfe Yōshi Shara nīchiano keyokōi nā maitio ano inō.

⁷ Akka Epa Niospa nā kirika āfe mifi kayakai aōri tsomakē Jesús fīa.

⁸ Fīxō tsomano nā cuatro Niospa onifanifo fe nā veinticuatro xanīfofo Jesús Ifofamisfo a nāmā feopakefōfānafo. Nāfāfe maneti yafi kechofo tso-

mafo. Nā kechofo oro fakka fakka ikai keskara mēranoax otano āfe kōi nofe nakas shara nai mēra foai keskara. Nāskarifiai nā Nios Ifofamisfāfe kīfiaifono Epa Niospa nikamis.

9-10 Akka nā fanāikaifo tsōa nikayomisma fanāikani, iskakani:

Mī afaa chakafayamafiamiskē mia retenifo. Mī noko nāxoni, mī imi foni Satanás anā nōko ifo inōma Epa Nios āfe fakefo nō inō. Nāskakē mī fistichi fitiro kirika kenea fēpexiki noko tāpimaxiki. Mīōnoax nā mia chanīmara faafo tii maifo tii anoafu Niospa yora itirofo meka fetsa fetsatapafāfe mekakani. Nāskakē nāfāferi fetsafo mī meka shara ato tāpimanano, mī ato amapaiyai keskara anōfo. Askatari nā maifo tii anoafu xanīfo mefe ixikani,

ikax fanāikafo.

11 Askatari ē ōia Niospa ājirifo ichapakōifo tsōa ato tanatiroma ichapakōi fanāikaifāfe ē ato nika. Nios xanīfo tsaoti ano nā Niospa onifaa cuatrofo fe nā xanīfofo veinticuatrofo feta nakifayakenafo.

12 Fāsikōi fanāikani iskafo:

Niospa Fake Jesús oveja fake keskara yorafo nāxōa āto chaka soaxoxikī. Akka keyokōi nā maitio anoafu ato īkitiro, keyokōi nai mēranoafori ato īkitiro, nōko mai anoafori āfenā, keyokōi tāpikōiakī, afama mīshti atiro, keyokōichi mī sharakōira fapanakafo. Mī fisti nōko Ifo itiro. Aicho, mī nōko Ifo mī isharakatsaxakī mī nīpanakara,

ikax fanāikafo.

13 Askata ē nika keyokōi nai mēranoafo tii fanāikaifono, mai anoafori fanāikaifono ē nika. Mai

mēranoafori ẽ nika. Fakafã anoafori fanãikaifono iskakani:

Epa Nios ẽfe tsaoti ano tsoa, ẽfe Fake Jesús oveja fake keskara, nã rafe nõko Ifo isharakõimisfo. Keyokõichi mã sharakõira ato fapanakafo. Mares fisti mã nõko Ifo itiro. Mã afama mĩshti atiro. Nãskara mã İpanaka, ikanax fanãikafo.

¹⁴ Askatari nã cuatro Niospa onifafãfe yoiãfo iskafakakĩ: “İAicho! Askapainõra,” fata, nã veinticuatro xanĩfofo Nios nãmã feopakefofãnafo. Afãferi Epa Nios yafi Jesús yoisharakani.

6

Nã siete taxtati

¹ Nãskata ẽ namakẽ õiai keskara ẽ anã õia. Jesús oveja fake keskara nãato noko nãxoni nãato nã kirika ẽfe taxtati fisti fẽpeaito ẽ õia. Fẽpeaino ẽ nika nã cuatro Nios onifaa fetsa fãsikõi mekaito nai tiri ikai keskara: “Niri ofe,” ikaito.

² Askaino kamayo oxo chaima nia ẽ õia. Nã kamayo kamaki fẽtsa kati tsomax tsoano xanĩfãfe maiti Niospa maimana. Nãnoax kamayonõ kaa fet-safo İkipai xanĩfo ixiki. Tsoa pishtakai nẽtefatiroma.

³ Askata Jesús anã kirika taxtati fetsa fẽpea. Fẽpeaino nã cuatro Niospa onifani fetsa ẽ nika iskaito: “Niri ofe,” ikaito.

⁴ Nãskafaino kamayo fetsari õshi nokotoshia. Nã kamayo kamaki tsoa fetsari ẽ õia. Keno chainipa Niospa inã aya katanõ maifo tii anoãfo ato shinãmatanõ anã isharanõfoma noikaspa faatanãkanax retenãnõfo.

⁵ Askatafata Jesús anã kirika taxtati fetsa fẽpea. Fẽpeaino nã cuatro Nios onifaa fetsa ã nika iskafakĩ yoiaito: “Niri ofe,” ikaito. Anori yoiaino kamayo fetsa fisokõĩ nokotoshiaito ã õia. A kamaki tsaõa aõ kilo tanati tsomax.

⁶ Nã cuatro Niospa onifani anoax mekaito ã ãfe meka nika iskaito: “Kori texe fayamanõ, fer-onãfãke pena fisti yonoxõ kori fixõ trigo kilo fisti fikĩ kopifatiro. Askayamakĩ tres kilo xiki fitiro. Kori texefayamaxõ afaa fetsa fitiroma. Nãskakẽ xini yafi nã uva fimi ene chakanafayamafe. Akka mã texefayamax mã fonãiki omiskõixii,” ixõ yoia.

⁷ Askata Jesús anã kirika ãfe taxtati fetsa fẽpea. Fẽpeaino ã nika na cuatro Nios onifani fetsa, “Niri ofe,” ikaito.

⁸ Anori askafaino kamayo fetsa pãshikõĩ nokotoshiaito ã õia. Nã kamayo kamaki fetsa tsaõa ika ãfe ane Ato Namamis. Nãato yorafo namatiro. “Ë yorafo namapaira,” faito, “Ëje. Mĩ ato namatiro,” Niospa faa. Askafaito nã ato namamisto yora fetsafoya ato retenãmai. Akka atiri ato fonĩ namai, atiri pae fetsa fetsatapafãfe ato namaxii, atiri yoinã põfefãfe ato yokakani. Akka yora kayakõĩ ato namaxiai ã õia tsõa ato tanãtiroma.

⁹⁻¹⁰ Nãskata Jesús ãfe kirika taxtamea anã fẽpea. Fẽpeaino nã Niospa meka ato yoifofãsafafono fet-safãfe ato redefinifono mã otoafõ ã õia. Epa Nios kĩfiti mãsa ano nã Jesúsnoax nanifo ãto fero mẽshofo ichanãkanax fãsikõĩ mekaito ã nika iskai mekaifono: “Nõko Ifo Nios, mã keyokõĩ tãpikõia. Mĩ afama mãshti fatiro. Mĩ shara famis. Mĩkai afaa chakafayomisma. Mĩ chanĩmakõĩ. Nã mia chanĩmara faafãfema mai anoafãfe noko retemisfo.

Nāskakē, ¿afetīa mī ato kopimē omiskōimakī?” ixō yoiaifāfe ē nika.

¹¹ Nāskakē nōko Ifāfe yoia isfakī: “Manayokāfe. Fena fena kakīma. Fetsafori mato keskarafori eōxō yonomisfo ixikani. Nāfori eōxō nā yora chakafāfe ato retexikani. Akka mā ato retekī mitoafono mā nakanax mato ano nokoxikani keyokōi. Nāskakē nā ato retemisfo ē ato kopixii ato omiskōimakī omiskōipakenakafo mēra ē ato potaxii afaramāi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inā, nāfāfemāi taeyoi nikanifono nā Epa Nios Ifofasharamisfo tii ato inā.

¹² Askata Jesús anā kirika āfe taxtati fetsa fēpeaito ē ōia. Fēpeaino fāsikōi mai naya naya ika. Xini anā pee iyamaino, rapati fisokōichi fepoa keskara ika, fakishkōi. Oxeri ōshikōi imi keskara ika.

¹³ Oa nefe kerexepato nokoki nefekī fana fimi yome mīshti niriatiro keskara. Nāskarifiāi fishifo nai mēranoax mai ano pakei fetsea.

¹⁴ Askatari nai kataramēake kafākē ē anā ōiama. Māchifā fe mai toomāfā mai naya naya ikaino, anā ano ikama.

¹⁵ Nāskakē keyokōi mai anoafō ratekōiafo. Yorafāfe āto xanīfofori sorarofāfe āto xanīfofori ratekōiafo; afama mīshtiyāfori, yora mitsisipāfori, āto yonomatīfori, fetsafori ifomaisfori keyokōi nāfo ratekōiafo. A tiiri mafa kini mēra ikiafo. A tiiri māchi keya ano ichoafō tokirinīfā nāmā oneafō.

¹⁶⁻¹⁷ Askata fiisikafo iskayanā: “¡Ooa! Epa Nios nai mēra ikato āfe Fake Jesús fe iskaratīa nokoki ōitifishkikōina. ¿Nō afeskatīromē

omiskōiyamaxiki? Tsōakai Nios timamatiroma noko omiskōimayamanō. Nā māchi keya anoa tokirinīfā nokoki pakepainō Niospa noko fichinōma nō omiskōinōma,” ixō nā nikakaspamisfāfe yoiāfo.

7

Niospa ciento cuarenta y cuatro mil afe yorafo kexexii

¹ Nāskata ē anā ōia oa ēfe namapa ōia keskara nā ē mato yoinō. Niospa āfe ājiri cuatro afe nai mēra imisfo ē ōia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpapakekafana. Nefe nishpapakekafanaino keyokōi maifo tii anoa nii peifo takka takka ikama. Fakafāri anā poo ikama.

² Nā cuatro Niospa ato yoiāito mai yafi fakafā chakafatirofo. Askata Epa Nios nipanakato āfe ājiri fetsa ē ōia xini oaikirinoax oaīto, nōko Epa Nios āfe marakka fati feaito, a afe yorafo aō marakka faxii keyokōichi tāpinōfo Niospa afe yorafokē. Nā Niospa ājiri okī nā cuatro Niospa ājiri fetsafori fāsikōi ato yoiā iskakāi:

³ “Manayokāfe, nā Nios Ifofamisfo īkisi āto femānāki āfe anefo keneyonō nāfāfe Nios yonox-omisfoki keyokōichi tāpinōfo. Nāskakē fena ato chakana fayamakāfe. Mai anoāfo fakafā anoāfori, ififo ato chakana fayamakāfe. Chipō ato axikakī,” ixō ato yoiā.

⁴ Akka ē nika mā Niospa ājirinī mā ato marakka faano ciento cuarenta y cuatro mil judeofāfe femānāki.

5-8 Nōko xini Israel āfe fakefo feronāfakefos doce inifo. Ato iyoakōichi āfe ane Judá. Judá āfe pefeta Rubén. Rubén āfe pefeta Gad. Gad āfe pefeta Aser. Aser āfe pefeta Neftalí. Neftalí āfe pefeta Manasés. Manasés āfe pefeta Simeón. Simeón āfe pefeta Leví. Leví āfe pefeta Isacar. Isacar āfe pefeta Zabulón. Zabulón āfe pefeta José. José āfe pefeta ato chipo fakekōi Benjamín. Nā doce feronāfake fisti rasi paxkakanax mā kaiafono nā doce feronāfake anoa Niospa ato katoní. Fetsa anoa doce mil faxō ifita, fetsa anoari doce mil faxō ifini. Nāato askafakī fetsa doce mil faxō ato ifiketsani. Nāskakē mā afo yosikanax ciento cuarenta y cuatro mil inifo.

Yorafā rasikōichi rapati oxokōi safeafo

9 Askata Epa Nios fe āfe Fake Jesús nā oveja fake keskara nā tsaoafo ano yorafā rasi niafo tsōa ato tanatiroma. Nā maitio anoafo fisti rasi anoafo, xoko fetsafo, meka fetsayafo ikafo, rapati oxokōi chainipa safeafo ē ōia fisti rasichi epe pei tsomafāfe.

10 Nāfāfe fāsikōi yoiāfo iskafakakī:

Nōko Epa Nios feta āfe Fake Jesús noko ifimis nōko Ifo Jesús oveja fake keskara nokoōnoax nani nōko chaka noko soaxoxikī nō afe nīpaxanō, ixō yoiāfo.

11-12 Nāskata nōko Ifo xanīfāfe tsaoti ano tsaoano āfe ājirifāfe foaketi fayakenafo ikafo. Nāskakē nā veinticuatro xanīfofo fe nā Niospa onifanifo cuatrofo nōko Ifo tsaoano tsaoafo ikafo. Nāskafono nā ājirifo nā nōko Ifo tsaoano ratokonō mai chachipakefōfākanax feopakefōfānafo Nios yoisharakakī iskafakakī:

¡Aicho! Chanĩmakõi, meres fisti mĩ ishara-pakemis. Meres fisti nokori mĩ imasharatiro. Mĩ keyokõi tãpia. ¡Aicho! Nã nõ yopai keskara mĩ noko axomis. Keyokõichi sharakõi mia fapanakafo. Mĩ afama mĩshti fatiro. Mĩ nãskapakenaka. Nãskaroko anõkĩ, ixõ yoiafo.

¹³ Nãskata nãnoa xanĩfo fẽtsa ea yõka: “¿Na yorafo rapati oxo chainipa safeafo tsoamẽ? ¿Fakiax feafomẽ, mĩ tãpamẽ?” ixõ ea yõka.

¹⁴ “Maa. Ĕkai tãpiana. Mĩ tãpia. Mĩ ea yoitiro,” ĕ fatto ea yoia iskafakĩ: “Yorafo omiskõiaifono na yorafori fãsi omiskõinifo. Akka omiskõiaifono Niospa ĕfe Fãke Jesús ato nãxoni ĕto chaka ato soaxoxiki. Ato chaka soaxõ mã ato imasharakõia. Nãskakẽ ato rapati oxo shara safemana.

¹⁵ Nãskakẽ Epa Nios ano iskaratĩa afe ikafo. Epa Niospa ato yonomana keskara axopakenakafo. Nãskakẽ ato kexefafãini afara chaka atoki nokoyamanõ.

¹⁶⁻¹⁷ Niospa ĕfe Fake Jesús Epa Nios fe imis. Nãato ato kexepakenaka. Nãskakẽ anã fonãitama, anã nomipakenakafoma. Xinĩri anã ato pipanakama. Jesús ato kexeaino inimapakenakafo. Ĕpa Niospa ĕto õiti ato fepeaxoxii anã oianõfoma,” ixõ ea yoia.

8

Nã taxtati mã keyoaino Jesús fẽpea

¹ Mã kirika ĕfe taxtati keyoano Jesús fẽpeaito ĕ õia namakẽ õiai keskara. Nã seis taxtati taefakĩ fẽpeyoa. Akka iskaratĩari fetsari fẽpea mã keyoaino. Fẽpeano Nios ika ano nai

mēranoax keyokōi nishparakafo. Media hora nishparakayoafō.

² Nishparakaifono ē ōia Niospa āfe ājirifo siete a ketaxamei niafāfe, nāfāfe Niospa ato yoimis keskara anōfo. Niospa ato tii maneti inā nā ato yoiatīa āto maneti chāi chāisafanōfo.

³ Askata Niospa ājiri fētsa sapa oro fakka fakka ikai keskara tsomax Epa Nios kīfiti ano nia ē ōia. Akka fētsa sapa kamaki nakas otaxō naneaito ē ōia. Nāskaxō Nios kīfiti mīsa ano oro kamaki sapa faa.

⁴ Askano āfe kōi nakas shara nai mēra foa āfe mifi kamaki sapa tsomano. Nāskarifiai Niospa yorafāfe kīfiaifono Epa Nios ika ari nokoaito nikatiro.

⁵ Akka ē anā ōia Epa Niospa āfe ājiri yoiaino, mīsa kamakinoa chii fixō āfe sapa kamaki chii fospi faa. Fospi fata nai mēraxō mai ano pota. Askaino mai anoax nai fāsikōi tiiri ika pachakōi ika, kanari piishika mairi naya naya ika. Nāskakē nā chanīmara faafoma tii ato omiskōimaxii.

Ājirifāfe maneti chāi chāisafafo

⁶ Askata Niospa āfe ājirifāfe siete nā manetifo Niospa ato tii inā itipinīsharafafo chāi chāisafaxikāki.

⁷ Askata fētsa āfe maneti chāi chāisafaino faka matsi tokoro efapafo imia osia nai mēranoax keyopakea. Chiiri imiya osia nai mēranoax mai ano pakea. Māifā kaxke fetsa koofi keyoa ififoya. Akka ranāri texea. Akka fasifo kooi keyokōia.

⁸ Askata Niospa ājiri fētsa āfe manetiri chāi chāisafaino machi efapa chii xoisai keskara Niospa nai mēraxō nāmā pota. Fakafā mēra pakea. Askaino fakafā kaxke fetsa imi keskara ika.

9 Nāskakē fakafā mēranoax fafīfo ranāri naafo. Askatari kanōanāfāfori ranāri kooafo.

10 Askata Niospa ājiri fētsa atori āfe maneti chāi chāisafaino fishi efapakōi xofisai chii keskara nai mēranoax pakea fakafo mēra. Akka faka fetsafo mērari pakeama. Askatari faka poyo poyo ikai ano pakea.

11 Nā fishifā āfe ane Mokara famisfo. Nā fishi faka mēra pakeano, faka moka paekōi ika. Nāskakē nā faka ayakanax yorafo ranāri nai fetsefo.

12 Askatari Niospa ājiri fētsa āfe manetiri chāi chāisafaino xinī anā chaxasharama. Ōxeri anā chaxasharama. Askatari fishifāferi anā ranārīto chaxasharama. Nāskakē penafekē tsōa anā ōisharatiroma. Fakish finakōia ika. Tsōa askara fakish ōiyomisma.

13 Ē nāfo ōiaino tetepafā keskara keya yoyaito ē nika. Fāsikōi mekayanā yoia iskafakī: “¡Ooa! Yorafāfe Nios nikakaspakanax omiskōikani finakōixikani. Niospa ājiri tres fetsafāfe āto maneti chāi chāisafaifono mai ano ikafo omiskōifinaxikani,” ixō tetepafā keskarato yoia.

9

1 Askatari Niospa ājiri fētsa āfe maneti chāi chāisafaino nai mēranoax oa fishi keskara nāmā pakeaito ē ōia. Nāskata nā niafaka chakafo kinīfā fakishifā mēra ikafo ano kaa. Nā kinīfā fepotiya. A mēranoaxkai kāitirofoma. Akka nā nai mēranoax nāmā pakea Niospa chavis inā aato kinīfā fakishifā mēranoa ato kāimanō.

2 Fēpeaino mafa kinīfā mēranoax kōinīfā nai mēra foa. Nāskakē xinī chaxasharama. Nai fakishkōi ika.

³ Askata nã koinĩfã mēranoax kōketsere keskara ichapa rasi mai ano fotoa. Niospa ato pōfekōi ima nifo keskara inōfo.

⁴⁻⁵ Ē nika iskaito: “Mai anoa fasifo fanafō ififo chakana fayamakāfe. Akka nã Niospa yorafo femānāki keneafō, ato tekayamakāfe. Akka nã ke-neamafo mā ato tekatiro. Akka ato reteyamakāfe. Ato retetamaroko cinco oxe ato amakāfe ato omiskōimaki,” ixō ato yoia. Nāskakē kōketserefāfe ato tekafo nã chanīmara faafoma nifo keskara paekōi meafō omiskōiafo.

⁶ Nāskakē kōketserefāfe cinco oxe ato omiskōimana nã chanīmara faafomafo napaixikani, tenetirofoma mekani. Askafikanax nakanima.

⁷ Iskaratīa na kōketserefo afe keskaramākī ē mato yoinō mā tāpinō. Kamayofō itipinī faax a kamaki tsaoax katiro fetsafo reteikai. Nāskarīfai na kōketserefo nã kamayo keskarafo. Kamayo kamaki tsaoxō fetsafo reteikai keskara ĩta, xanĩfāfe āfe oro maiti maia keskara ĩta, āto fēso feronāfāke fēso keskara ĩta,

⁸ āto foo kērofāfe foo keskara ĩta, āto piti poomānā piti keskara ĩta,

⁹ āto xochi ano rapati kerekkōi keskara safem-anano ato tsakapaiyaifono a mēra ikitiroma ĩta, āto petafo pei pei ikī kamayonō karo keskara nini-aino pachakōi ĩta, fetsafo retenāifo keskara ĩta,

¹⁰ keyokōi tsitsisyafō. Āto tsitsisi yora chachitiro nifo pae keskara. Āto tsitsisi yorafo omiskōimatiro. Mā oxe cinco finōano anā ato omiskōimatirofoma.

¹¹ Nã kinĩfã fakishifã mēra niafaka chakafo ikafo anoa āto xanĩfāfe ane israelifāfe mekapā Abadón famisfo. Griego mekapari Apolión famisfo. Nōko

mekapari, “Yorafo Retemis,” nō famis.

¹² Akka taeyoi a omiskōiaifo mā finōfiano, akka nāno raferi a finakōia finōama.

¹³ Askata Niospa ājiri fētsa āfe maneti chāi chāisafaino, Epa Nios kīfiti oro mīsa shara ano fakka māxo cuatro nia ika. Nā mīsa nakirafenoax mekaito ē nika iskafakī āfe ājirinī yoiaino āfe maneti tsomaxō nika.

¹⁴ “Nā cuatro niafaka chakafo menexemexō nā faka efapa Eufrates anoxō manaifo ato mēpetāfe fotanōfo,” ixō āfe ājirinī yoia.

¹⁵ Nā tsekeafō penata Niospa ato yoiaino ichapakōi ato retenōfo. Nāskakē nā niafaka chaka cuatro Niospa itipinīfani mai kaxke fetsa ano ikafo ato retexinōfo.

¹⁶ Ē nika dos cientos millones sorarofō kamayo kamaki tsaoafāfe fetsafo retexikakī.

¹⁷ Askata Epa Niospa oa namakē ōia keskara ea ōimana nā sorarofō yafi āto kamayofō ē ōia iskara. Āto xochi ano oa chii ereai keskara kerexkōi āto xochi ano safeafo ikafo. Askatari nanakōiri ika, chaxtari ika a aō xorakomeafo. Akka a kamayofāfe āto mapo poomā mapo keskarafo. Āto āxfā mēranoax kōi fe chii ereai keskara.

¹⁸ Chii fe kōi xofisakī āto āxfā mēranoax kāifaikī ato retepakeafo yorafo ichapakōi ranāri naafo.

¹⁹ Āfe āxfā feta āfe tenēri yorafo retetiro. Āfe tene rono pae keskara. Āfe tene mapoya ika. Nāo yorafo omiskōimana nanōfo.

²⁰ Tsoa nayamafixō āto chaka xateafoma Epa Nios Ifofaxikakīma. A niafaka chakafo ifofamisfo xateafoma. Nāskakē oro nimofō fakāta, a kerexkōi fakkai fakkaisai nimofō fakāta, keno āfe ane bronze nimofō fakāta, ifi nimofō fakāta, tokiri

nimofa fakāta; nāfo askafaxō, “Nāfo nōko nios. Nō aō noi,” ixō yoimisfo. Afāfe ōiyamafiaifono, askatari mekayamafiaifono, askatari kafāsayamafiaifono, nāskakē afo kīfimisfo. Epa Niospa nā āto kaifo yafi yora fetsafo omiskōimafiaito ōifikanax āto chaka xateafoma Epa Nios Ifofapaikanima.

²¹ Ato retekakī xatemisfoma, askatari koshoiiki xatemisfoma, askatari āto āfima chotamisfo, kērofāferi āto fenema chotamamisfo, yometsoriai xatemisfoma nāfo xateafoma. Tsōa āto chaka xateama. Nōko Ifo Jesús Ifofaxikakima. Nāfo chakakōifikaxō āto chaka xateafoma nōko Ifo Jesucristo Ifofasharaxikakima.

10

Epa Niospa āfe ājirinī kirika tsoma

¹ Askata ē ōia Niospa āfe ājiri fetsa mitsisipakōi nai mēranoax fotoaito, nai kōiya. Āfe maiti nāfa fai keskara maia. Āfe femānā xinī chaxai keskara. Āfe kishi rafe chiī keskara.

² Kirika fepekemea tsomax nia ika. Āfe tae kayakai aōri fakafā femākīa paia. Akka āfe tae oshkiori mai ano paia ika.

³ Askata āfe meka poomā efafato meka keskara ē nika. Askatari ē nika naitiriki fetseaito.

⁴ Mē nikaxō nā yoiafo keskara ē kenekerana. Akka nai mēranoax Nios ika anoa meka fetsa ē nika ea yoiaito iskafakī: “Nā mī nika keskara āto meka keneyamafe. Mī tsoa tāpimatiroma,” ixō ea yoia.

⁵⁻⁷ Askata nā Niospa āfe ājirinī takai fetsa fakafā aōri paita takai fetsari mai ano paixō anā yoia. Epa Nios nā nipanakato nai onifaa. Askatari nai mēra ikafo onifaa. Askatari mai onifaa. Mai ano

ikafori onifaa. Askatari fakafã onifaa. Fakafã mēra ikafori onifaa. Nã Nioskõichi âfe âjiri yoia iskafakĩ: “Epa Niospa ea õiaino chanĩmakõi ē mato yoi. Epa Niospa anã manaima. Āfe âjiri fētsa âfe maneti manekĩ chãi chãisafaino Epa Niospa axiai keskara âfe meka yoimisfãfe yoiaifo keskara yorafãfe tãpinifoma. Iskaratĩa a Nios yoimisfãfe yoinifo keskara mã askakõia,” ixõ Niospa âjirinĩ ea yoia.

⁸ Askata anã nai mēranoax mekaito ē nika ea yoia iskafakĩ: “Oa Niospa âjiri fakafãki paita mai ano paiax nia ano katãfe. Nã kirika kataramea fēpexõ tsoma fiatãfe,” ea faa.

⁹ Askata ē Niospa âjiri ano kaxõ ē yoia iskafakĩ: “Nã kirika pishta ea inãfe,” ē faito, “Nakĩa, fife. Ōixõ tãpikõife. Mã tãpikõixõ mĩ tãpitiro nã meka chanĩmakõi. Niospa meka shara. Askatari mĩ tãpitiro na meka yoiaifo keskara yorafo omiskõikani. Mĩri tãpixõ mĩ fãsi shinãtiro,” ea faa.

¹⁰ Nãskaxõ ē kirika pishta fita ē õia. Ea yoia keskara chanĩmakõi mē tãpikõia. Nã Niospa meka sharafinakõia. Nãskakē nã inõpokoai yoia keskara yorafo omiskõixikani. Nã õiax ē shinãmitsakõia.

¹¹ Ē askano, anã ea yoia: “Niospa afe yorafo yoipaiyai keskara anã ato yoife. Afarafo ixiai yorafoõnoa yoife, manifetsafoõnoari yoife, xanĩfofoõnoari ato yoife,” ea faa.

11

Nõko Ifo Jesús yorafo yoipaiyai anori feronãfake rafeta ato yoixikani

¹ Askata na tanati metro keskara ea ināyanā ea yoia iskafakī: “Nāo Nios kīfiti pexefā anoā āfe chainipa yafi āfe xāki tanatāfe. Anoxō Nios kīfiti mīsari tanafe. Askatari a mēranoax fanā ikanaifo ato tanasharafe afe tiito Epa Nios fanā ixokanimākai, askatari afe tiixori kīfikanimākai ato tanasharafe.

² Akka a ketokonō mapoafō a israelifoma ato tanayamafe; afāfe na Jerusalén anoafō ato chakafakani oa fākka nō afara faanano fākka peamanaino kāitiroma keskafakani ato. Cuarenta y dos oxe amaxō ato askafaxikani.

³ Nāskakē nā feronāfake rafe ē ato nīchixii. Nā rafeta nā ē ato yoipaiyai anori ato yoixikani. Un mil dos cientos sesenta pena ato yoixikani ēfe meka. A rafeta āto rapati chapokōi safexō ato ōimaxikani. A ato chakafamisfāfe, ato ōikakī a afara chakafamisfo shināxikani,” ixō ea yoia.

⁴ Nāskakē Niospa afe yorafo yoipaiyai keskara nā rafeta yoimisfo. A rafe oa ifi olivo keskara. Āfe xini fospia keskariai, a feronāfake rafe Niospa Yōshi Shara ato mēra nanekōiafo. Askatari afia rafe oa rāpari ōtai keskara. Mā fakishkē rāpari otakē nō ōisharakōitiro. Nāskarifakī nā rafeta Niospa Yōshi Sharaōxō ato tāpimaxikani Niospa meka. Mā isharakōikaxō āto Ifāfe meka ato fe yorafo yoixikani.

⁵ Na Niospa meka yoimis rafe fetsafāfe ato chakafapaiyaifono, āto axfa mēranoax chii kāitiro ato koofaxii nanōfo. Nāskakē nā rafe tsōa ato chakafatiroma.

⁶ Epa Niospa ato yoiaino, nā rafeta āto mekapa oi nesefatirofo anā fena oi iyamanō nā ato yoiaifotīa. Askatari faka yafi ĩa āto mekapa

fetsafatirofo oa imi keskara inō. Askatari afara afeskarafapaikakī āto mekapas afara meseni fetseaifo fatirofo pae fetsa fetsatapafori fatirofo.

⁷ A feronāfake rafeta mā ato yoikī senēfaafono, a chakakōi mai kinifā mēranoax Satanás shināmanaino, tsekeinākafā a feronāfake rafe retexii.

⁸ Mā reteafono, fāi nēxpakīa pakeax rakaxikani nā Jesús mastanifo ano, a Jerusalén ano. Nā Jerusalén anoafāfe nōko Ifo Jesús āfe meka shināmisfoma. Nāskakē nō aōnoa yoitiro iskafakī: “Na Sodoma ano ikafo feta Egipto ano ikafāferi, afaa shināpaonifoma. Nāskakē chakakōi ipaonifo anoafō. Nāskarākōi Jerusalén anoafori.” Nāskax nā feronāfake rafe Jerusalén anoax nakanax āto yora fai nēxpakīa rakaxii.

⁹ Nāskakē yora fetsafo a mai fetsa ari ikafāfe, xoko fetsafāferi, meka fetsayafāferi, a feronāfake rafe rakafāfe ato ōixikani. Nāskafono āto xanīfofofāfe, “Ato fena maifayamakāfe,” ixō ato yoixikani ato noikaspakōikakī. Nāskakē tres nia ato ōixikani.

¹⁰ Askaito ōikani a mai ano ikafo atoki inimaxikani. Askakanax atoki inimakakī fista axikani. Aa ranā kaxpa afarafo inānōnāxikani. Yoikani iskaxikani: “Anā na rafeta noko fekaxtefakanima kiki,” ikanax inimasharakōikani. “Anā nōko chaka noko yoikanima,” ikanax yoināxikani.

¹¹ Askafiaifono mā tres nia oxata nayoafono anā chipo Niospa ato otifaxii a feronāfake rafe. Askaito ōikani a ato mǎnǎo nikaxō ato ōiaifo, afo mesexikani, ratekōixikani, askaifāfe ato ōikani.

¹² Askata nā feronāfake rafe otokāta nai mēranoax mekaito nikakani ato iskafaito:

“Niri ekeki māpeferakāfe,” ato faito nikakani a rafe āto ferotaifi ronoinīfofākani nai kōi mēra māpefainifokani. Askaifāfe a ato noikaspaiifāfe ato ōikani.

¹³ Askata samama atoya mai naya naya iki finakōia. Pexefā rasi fisti rasi potaito ē ōia. Askaino siete mil yorafo naafo. A naamafāferi ratekakī Nios yoiāfo, “Nios mīfi afama mīshti fatirokī,” faafo.

¹⁴ Mā afo askayoa anā chipo finakōixii.

Niospa ājiri fētsa āfe maneti chāi chāisa faa

¹⁵ Akka Niospa ājirinī chipokōitakī nā sietepa āfe maneti chāi chāisafaino, nai mēra Epa Nios ika ariax fāsikōi mekaifāfe ē nika iskai mekaifāfe:

Iskaratīa na nōko Ifo Cristo xanīfokōi iki nāmānoax nai mēra ika keskarari ixii nāatixō xanīfo īpanaka,

ixō yoiāfo.

¹⁶⁻¹⁷ Akka nā Jesús chanīmara faafo ato kexemisfo nā veinticuatro feronāfakefo tsaokanax a Nios nāmā feopakefofā nafo Nioski inimayanā iskafafo:

¡Aicho, mī fāsi sharakōiki! Mī afama mīshti famiski. Mī Yōshi Sharapa ato īkinā. Afama mīshti onifaaxma mī iyopaonixakī. Iskaratīari mī nia.

¹⁸ A mai fetsa anoafāfe mia noikaspamisfo mikiki ōitifishkikōikakī mefe ikaspakakī. Afama mīshti chakafamisfo. Askaifāfe ōikī, mīri ato kopikī ato omiskōimaxii atoki ōitifishkikōixō. Akka a mia Ifofamisfo mī ato ināsharakōixii afara sharakōifo. Akka a mia yonoxoyanā mī meka mēxotaima yoimisfo afo mī ato ināsharakōiketsaxii, a mia chanīmara famisfo tii; keyokōi afaamaisfo ita, a xanīfori a

afama mīshiti ichapayafori mī ato ināsharakōixii a mia Ifofamisfo tii. Akka nā yorafo chakafamisfo, mī ato omiskōimaxii, a amēranoax, omiskōimiffo mēra mī ato potaxii, ixō yoiāfo.

¹⁹ Askata a Nios kīfiti pexefā nai mēranoax fepekemeaito ē ōia. Nānoa Niospa kafo ē ōia, nā kafo mēra a Niospa israelifo yoini kirika kenea nanea ika. Askatari ē ōia kana pee ikaito nairi tiri ikaito ē nika, mīamāfanēri mai naya naya akaito ē ōia, nai mēranoaxri oi kaya ikaino, oi nami key-opakeaito ē ōia.

12

Kēro yafi kapetafā keskara nai mēranoa Juan ōini

¹ Askata ē afianā ēfe namapa ōia keskara ē mato yoinō a ea Niospa ispaito ē ōiafo nā inōpokoāifo ōikī ē tāpinō a tsōa ōimismafo. Ē kēro ōia āfe rapati oa xinī pee ikai keskara safea ika nai mēranoax. Oxe kamaki paiya keskara. Askatari āfe maiti ano fishi doce aō neāfo.

² Askata nā kēro mā chaima fake kākī, fāke pāefai.

³ Askainori fetsari ē ōia a tsōa ōiyomisma keskara nai mēranoax. Nā Satanás oa ronofā keskara efa-panāfakōi ōshimāfa, askai mapo ichapayakōi siete mapoya, askai a āto xanīfokōichi maiti sharakōi keskara maiya siete faxō, askatari āfe māxofori diez ika.

⁴ Askata āfe tene fininīfofā nai mēshanānaino nai mēranoax fishi rasi pakea. (Naskarifakī Epa Niospa ājirifo Satanás atiri ato chakana fama ato īkipaikī, “Ea ifofakāfe,” ixō ato feparapaikī. Nāskakē

a keskara niafaka chakafo ato ĩkinō Niospa nāmā potani nāmāxō ato ĩkinō.) Nāskakē mā kēro chaima fake kāiyaino, a ronofānē kexei āfe fake pīapaikī kāiyaito.

⁵ Askata a kēro fake kāi feronāfake mitsisipakōi. Nāskakē yorafo manifo tii, ato kexesharakōixii āto xanīfo finakōia ixii. Mēstekōi ato yoisharakōixii nikasharakōinōfo. Askafiaito a fake yome rama afa kāiyaito ronōfānē pipaiyaino Niospa ifirisafaa nai mēranoax afe xanīfokōi inō.

⁶ Askaito ōifaini afa ichoachāi tsōa istoma ano a Niospa afetīama itipinī faxoni ano Satanás afeskafanōma arixō Niospa kexenō cuarenta y dos oxe akaino Niospa kexesharanō.

⁷ Askatari ē anā ōia Satanás āfe inafō fe nā ājiri Miguel āfe inafō nai mēranoax retenāpaiyaifono Satanás ato finōpaiyaino. Nāskaxō Satanás Niosri finōpaina.

⁸⁻⁹ Akka Satanás ato finōpaifikī ato finōnima. Nāskakē fanī itirokēma Niospa nāmā potani āfe inafōya. Taeyoi ājiri iyopaoni. Nāskaxō nāato keyokōi yorafo maifo tii anoafō ato pāramis anorima ato yoikī chaka shinānōfo, chaka nīpaxakakī.

¹⁰ Askaito ē anā nika meka eapato mekai iskaito: “¡Aicho! Epa Niospa mā Satanás nirixō nāmā potaki, mēxotaima āakōi noko fanīrira pārarifaito. Nāskakē Epa Niospa Satanás finōinīfofana. Nāskakē Satanás anā nōko ifo ikima, anā fanīrira noko shināmanima, Epa Nios fisti nōko Ifokōi iki. Askatari āfe Fake Jesucristori nōko Ifokōiri iki. Nā rafe nōko Ifokōi.

¹¹ Nāskakē Jesús Ifofaxō mēxotaima nō yoimis

niri nai mēra oyoxoma nō yoiyopaoni nāmāxō iskafakī: ‘Nōko Ifo Jesús, Niospa Fakekōi, oa oveja fake keskaraxō noko nāxoni nōko chaka noko soaxoxiki,’ ixō nō yoimis mēxotaima. Askatari nō Niospa meka ato yoimis. Nāskai nō meseima, ‘Noko retefiaifono, nō inimasharai,’ ixō anori mēxotaima nō yoimis. Askaxō nō Satanás finōinīfofana.

¹² Nāskakē māri nono nai mēranoax inimakāfe Niosnoax. Nā chanīmara faafāfe Jesúsxō mā Satanás finōkōiafo. Akka Satanás Niospa nāmā potani nai mēraxō. Askafaino ōitifishkiki nāmā fotoxō yorafo chakafapaikōi. ¡Ooa! Yorafo ono mai anoax fe fakafā mēranoaxri omiskōikani. Satanás mā tāpia afetīara Jesús mai ano fotoai tsōa anā afaa chakafanōma. Nāskara mā tāpiax Satanás ōitifishkikōikī keyokōi maifo anoafō ato chakafamapai omiskōinōfo Jesús fe ĩpaxanōfoma,” ixō nai mēranoax mekaito ē nika.

¹³ Mā afo nikakī ē anā ōia afia ē ōiyoa keskara. Mā Niospa Satanás nāmā potano, Satanás shinākī iskafai: “Na kēro ē akiki nokoxō omiskōimanikai,” ixō shinākī Satanás chīfafaina.

¹⁴ Nāskakē Niospa nā kēro tetepafā pei keskara inā aō katanō tsōa istoma ano. Nā afetīama Epa Niospa itipinī faxoni ano mā kaxō anoxō piinō cuarenta y dos oxe akī, nā niafaka chakata ronōfā keskarato afeskafanōma.

¹⁵ A kēro ari ikano chakafapaikai Satanás ari kai. Mā kaxō chaima nikaxō āfe axfapa faka siiakī faka faipafānē iyotanō āsapaikī.

¹⁶ Askafaito ōikī Niospa mai kaxkexoni a mēra faka faipafā ikikaitanō a kēro afeskafanōma.

¹⁷ Nāskaito ōi Satanás a kēroki ōitifishkikōina.

Nāskax nā kēromā āfe fakefoki kaa ato retepai, nāfāfemāi Niospa meka nikakōisharaifono isharakōiyanā Jesús Ifofasharakōiyanā.

¹⁸ Askata ē anā ōia Satanás fakafā kesemē nia.

13

Fakafā mēranoax yoinā keskara mesekōi kāinākafana

¹ Askata ēfe namapa ē ōia keskara afianā ē mato yoi. Ē ōiaino fakafā mēranoax yoinā keskara mesekōi kāinākafanaito ē ōia. Nā yoinā pōfe keskaraōnoa ē mato yoinō. Ea nikasharakāfe. Nā fistifiax mapo ichapaya, siete mapoya. Askatari āfe māxo rasi diezya. A āfe māxo rasi xanīfāfe maiti maimakī fetsa. Nāskaxō Epa Nios mekafakī chakakōi faa. Āfe femānāfoki ane fetsafo chakakōifo nēta.

² Askai oa poomā keskara āfe yora. Askatari āfe tae oa osopa tae keskara. Askatari oa poomā axfa keskara. Nāskara Niospa ea ōimana ē tāpinō a feronāfāke Satanáōxō tāpikifinakōia, oa xanīfo finakōia keskara ixii nāmānoax. Satanás āfe yōshi ināno ato yoimis ixii, afama mīshti fakī fetsaki ato ōimaxii.

³ Āfe mapo fetsa ano mā māpeafiafono anā otoax afianā nia. Nā mai tio anoxō yora rasichi ōikani askaito: “Kee, ¿afeskax otoamē mā nākōina nō ōia?” ixō yoikani. Nāskaito ōikī ifofaxikani.

⁴ Nāskakē ifofakaxō yoikani Satanás iskafakī: “Mī fāsi sharakōi. Mī afama mīshti famis,” fakaxō ifofakani. “Nāskaxō nā yora pōfekōi inō mī yōshi mī inā nōko xanīfokōi inō. Nāskaxō nō mia chai faima,” fakaxō yoikani. Askatari oa yoinā

keskara akiki inimakakī fanāixokani iskafakakī: “Mia keskarakai tsoama. Mī fāsi sharakōi. Miakakai tsōa chakafatiroma. Mī fistichi ato finōkōia,” fakaxō yoikani fanāikakī.

⁵ Askatari anā Nios chakakōifakī yoia iskafakī: “Fato fetsakai ea keskarama. Ē Nios finōkōia,” ikax, āa chanī Nios chakafakī finakōimis. Nāskafekē Niospa yoixii: “Cuarenta y dos oxe finōta mī anā afaa fatiroma xanīfokōixō afara fetsafo sharafakī.”

⁶ Nios noikaspakī mekakakī fetsaito ē nika iskafaito: “Fato Nioskai nai mēra ikama. Anā ano Niosma. Mā kaxpakōi mā Nios Ifofai,” ixō yoia. “A yora namisfāfekai fato Nios Ifofamisma,” ato fakī fetsai.

⁷ Askatari Satanás ifofakaxō ato afara shināmānaino yorafāfe a Jesús Ifofamisfo ato finōpaikī ato retepaikani āto xanīfo ipaikakī. Askatari maitio anoafō, xoko fetsafo, meka fetsafoya keyokōi āto xanīfo ikani a feronāfake xanīfo chakakōi a Satanás yōshi a mēra nanea.

⁸ Askafaxō yoisharaxikani akiki inimakakī: “Mī fāsi finakōia, mī nōko nioskōi,” ixō yoixikani akiki inimakakī. Askaifāfe tāpixō nōko Ifo Niospa atoki kirika keneama a Ifofaafāfema ōikī. Mai onifaitaima mā tāpixō Niospa āto anefo āfe kirikaki kenenī fatofāfe Jesús Ifofaimākai. Akka nā Jesús ovejanā fake keskara noko nāxoni noko ikipakexakī.

⁹ Mā pachoyakī ea nikasharakāfe.

¹⁰ “Nā Satanás ifofaafāfe mato karaxa mēra ikimakaki mato ikimaxikani. Askatari mato kenopa retekakī mato retexikani.” Nāskakē efe yora mīshtichi, shināchakayamakāfe. Nā nō Jesús chanīmara faafo tii nō omiskōifikī, nō tenekōixii nōko Ifo Jesús shināmakitama.

11 Askatari ě anā ōia oa namakē ōia keskara. Mai mēranoax kāinākafanaito ě ōia yoinā pōfe fetsa keskara. Āfe māxo tiixo pishta rafe oveja fakenā keskara. Askai fāsikōi mekai oa poomā keskara āfe meka mēxakōi chai potai. Askaito ě ōia.

12 Akka nā yoinā pōfe taeyoi fakafā mēranoax kāiyaito afama mīshti atiroxakī nāato yoiaino nā rama oatori afama mīshti atiro nā fētsa aka keskafakīri nāskaxō yorafo tii ĩkitiro. Keyokōi maifo tii anoafō ato yoia iskafakī: “A yoinā keskara mā mapoki rerafo mā nayoflax afianā mā otoa nā fisti ifofakāfe. ‘Na nōko ifora,’ fakāfe,” ixō ato yoia.

13 Afama mīshti tsōa atiroma keskara ato ispa yorafāfe chanīmara fanōfo. Nāskata yorafāfe āto ferotaifi nai mēranoa chii fotomana.

14 Satanáōxō nāskarifikī yorafo pāra niosra fanōfo. Askafata ato yoia: “Nā yoinā pōfe keskara retefiafono mā otoa nā nimofonōfā faxō inākāfe a keskara faxō,” ixō ato yoia.

15 Nānori ato yoiaino mā nimofonōfā mēpeakano xākaitiroma. Askafiano Satanáōxō xākaima mekanō, askatari a siete mapoya mekayamaifo ato retenō.

16 Askata anā ato yoia iskafakī: “Maitio ikafāfe āto mēke kayakai aōri kenenōfo askayamakī āto femānāki kenenōfo.” Nā yoinā pōfe keskara fakafā mēranoax kāiato āfe ane keneyamakī āfe número ato kenemana. Keyokōi ato kenemana. Fakefo kenemata, xinifori kenemata, afama mīshtifoyari kenemata, afaamaisfori kenemata, inafomari kenemata, inafori kenemana. Tsoa pishta finōmanama. Keyokōi nā yoinā pōfe keskarato

ãfe ane atoki kenemana.

¹⁷ Tsõa nã ane keneyamaxõ afaa fitiroma. Askatari afaa inãmitsatiroma a piaifori tsõa fitiroma, a rapati yopaifori tsõa fitirofoma.

¹⁸ Nãskakē Niosxõ shinãsharatirofo nã yoinã põfe keskara ãfe número tãpitirofo. ãfe número tãpixõ ãfe aneri tãpitirofo. Nã yoinã põfe keskaraflix feronãfakekõi, ãfe número seiscentos sesenta y seis.

14

Jesús chanĩmara faafo ciento cuarenta y cuatro mil akiki fanãikani

¹ Askata ěfe namapa ě õia keskara afianã ě mato yoinõ. Nã Jesús ovejanã fake keskara mächifã ãfe ane Siõn ano nia ě õia. Askatari ciento cuarenta y cuatro mil afe yorafo afe niafo ika. ãfe ane Jesús yafi Epa Nios ãto ane femãnãki kenea ě õia.

² Nãskatari nai mēranoa meka efapakõi ě nika. Faka põoitifã keskara ě nika, nai tiri ikai keskarari pachakõi ě nika. Meka efapari ě nika yora ichapa fanãikanaifono ãto manetiya ichapa rasi fanãikanaifãfe ě nika. Nã manetinĩ ãfe ane arpa.

³ Fana fena tsõa nikayomisma Epa Nios ferotaifi fanãixõafo. Nãnoxori nã cuatro Niospa onifanifãfe nikakani. Askatari nã veinticuatrofãfe nikakani. Nã ciento cuarenta y cuatro mil nono mai anoa Jesús ato ifini, nãfãfe na fana fena tãpitirofo. Tsoa fẽtsakai tãpitirofoma.

⁴ Nã ciento cuarenta y cuatro mil yorafãfe nõko Ifo Jesús Ifokõi famisfo. Afara chaka shinãtamaroko Jesúsnoa shinãfafãikani. Aato ato ifimis ato nãxonixakĩ Epa Nios yafi ãfe Fake Jesús

Ifokōi fakanax āfe yora inōfo. Ato iyopaiyai ari afe fomisfo. Ato katoa afe yorakaxō ato yoiai keskara anōfo.

⁵ “Nāfāfe chanīkī yoimisra,” ixōkai tsōa atoōnoa yoitiroma. Jesúsnoax isharamisfo. Aōxō afaa chakafamisfoma.

Niospa āfe ājiri trespa yoiafo

⁶ Askata ē ōia Niospa ājiri fētsa nai mēra ika fāsi keyakōi yoyakī keyokōi yorafo maifo tii anoafō ato meka shara yoia. Yorafo keyokōi yoita, xoko fetsafo tii yoita, nā meka fetsa fetsatapafāfe meka yoimisfori yoita, nā mani fetsafo tiiri ato meka shara yoia. Epa Nios nipanakaōnoa ato yoia.

⁷ Mekakī fāsikōi ato yoia iskafakī: “Nios shinākāfe. Nikakōikāfe. A noikōikāfe. ‘Mī sharakōi, mī afama mīshti mī atirora,’ fakāfe. Iskaratīa Niospa nā keyokōi chakafamisfo ato omiskōimani. Nāato nai onifani, mairi onifani, fakafāri onifani, faka sharari onifani. Nāskakē a noikāfe: ‘Mī nōko Ifo Nios sharakōi,’ fakāfe,” ato faa.

⁸ Askata Niospa ājiri fētsa mā mekai keyoano fetsari nokotoshixō iskafakī yoia: “Babilonia ano pexe rasi iyopaoni. Iskaratīa anā ano tsoa ikama. Nānoxō yorafāfe afara chaka shināpaonifo. Fetsafori afara chaka ato famapaonifo ato keskara inōfo. Askāifāfe Epa Niospa ato omiskōimani anā ano inōfoma. Nāskakē Babilonia anā anoma,” ixō Niospa ājirinī nai mēra ikato yoia.

⁹⁻¹¹ Askata afianā Niospa ājiri fetsari nai mēranoax nokotoshixō meka fāsikōi yoia iskafakī: “Fētsa nā yoinā pōfe keskara yafi āfe nimofō keskara nikakōikī yoimis iskafakī: ‘Nā ēfe nioskōi,’ ixō anori yoikī āto mēkeki kenenifo, askayamakī

ãto femãnãki na yoinã pöfe keskarato ãfe ane keneafãfe Epa Nios atoki õitifishkikõixii. Nãfo Niospa ato fãsi kerexkai omiskõimaxii. Chii mēra ato potafianokai keyonakafoma. Jesús ãfe ãjirifo sharakõifo feta õiaino a omiskõipakenakafo mēra Niospa ato potaxii chakamãi famisfono, Nios nikakaspakakĩ. Pae meekakĩ xatenakafoma. Tsõa ato ifitiroma, nã yoinã pöfe keskarato ãfe ane ãto mēkeki keneafono, askayamakĩ ato femãnãki keneafono. Nãskakē pena tii ita, fakishchãi ita, omiskõixikani tenepakenakafoma,” ixõ Epa Niospa ãfe ãjirinĩ yoia.

¹² Nãskakē efe yora mĩshtichi, mãto õiti inima-masharakãfe. Omiskõifikĩ tenekãfe. Niospa noko yoini keskara akãfe. Nõko Ifo Jesús kachikiri fayamakãfe.

¹³ Askata ã meka nika nai mēraxõ ea yoiaito: “Ë mia yoiiai keskara kenefe. Fatorafono nõko Ifo Jesúsnoax nai, inimakõixikani,” ixõ ea yoia. “Chanĩmakõi. Mã nakanax anã omiskõitirofoma. Epa Niospa ato ama keskara akõikanax, nãskakē inimakõixikani. Nãfãfe fetsafo shara faxomisfono Nios atoki inimasharaxii. Akka Epaki nokoafono ato inãsharaxii,” ixõ Niospa Yõshi Sharapa yoia.

Nã chakafamisfoki Nios õitifishkikõikĩ maifo tii anoafono ato ichanãfai ato omiskõimaxii

¹⁴ Akka ãfe namapa õia keskara afianã ã mato yoinõ. Ë afara fetsa õia nai kõi oxokõi kamaki feronãfake tsaokē ã õia. Ë õikĩ iskafaa: Xanĩfãfe maiti orokõi maiya, askatari keno extea ikikõi tsoma ika.

¹⁵ Akka ãfe ãjiri fetsa Nios kĩfiti pexefã anoax kaxõ fãsikõi yoia iskafakĩ: “Nã maifo tii ano

mā fanafo ōshia. Nāskakē iskaratīa mā fanafo chetekani. Akka mī keno exteato taxtexō ichafafe,” faa. Nānori yoifikī fanakōifoōnoa yoia. Niospa yorafoōnoa yoia iskafakī: “Iskaratīa keyokōi Jesús chanīmara faafo tii ifife Epa Nios fe ika anoax ichanākanax afe ĩpaxanōfo,” ixō yoia.

¹⁶ Askata nā nai kōi kamaki tsaoto āfe kenopa fanafo taxtea keskafakī āfe sharaōxō a chanīmara faafo tii ifia afe ĩpaxanōfo.

¹⁷ Askata ē ōia nai mēranoa ājiri fetsari Nios kīfiti pexefā anoax kaito, aatori keno extea ikiai tsomāx.

¹⁸ Afianā ājiri fetsari Nios kīfiti mīsa anoax kaa. Nāato Niospa maifo tii anoa koatiro. Nāatori keno extea ikiai tsomax fāsikōi mekayanā yoia: “Nā uva fimi mā pachiaki. Mextexō ichafafe,” ixō yoia. Nāskarifikī Epa Niospa āfe ājiriōxō a nikakaspamisfo ichanāfaxii.

¹⁹ Nāskata nā Niospa ājirinī āfe keno extea ikiai tsomaxō uva xatexō āfe tsinīti mēra nanea āfe ene fonō. Nāskarifikī Niospa ājirifāfe nā Niospa meka nikakaspamisfo ato ichanāfai. Akka Nios atoki ōitifishkikōixō ato omiskōimani.

²⁰ Nios ika anoxō ato omiskōimanama. Iskafakī ēfe namapa ē ōiai keskara ea ōimana. Fetsafāfe ato retexikani āto imi ichapa foxii. Askara tsōa ōiyomisma. Āto imifo kamayofa tesanākōixii. Āto imi chaikōi trescientos kilometros foxii. Ato imi noakōi un metro ixii, nakirafekōi. Nāskarifikī nā Epa Nios nikakaspamisfo omiskōixikani ato omiskōimanaitīa.

*Epa Nios āfe ājiri siete afianā ato yoia mai anoafo
ato omiskōimanō*

¹ Askata anā ēfe namapa ē ōia keskara ē mato yoinō. Afara fetsa tsōa ōiyomisma nai mēranoa ē ōia. Ē ratekōia. Akka Nios nā yora nikayospafoki ōitifishkiki. Nāskakē āfe ājiri siete ato yoia keyokōi mai anoafo ato omiskōimanōfo. Mā askafafono Epa Niospari ato omiskōimani. Akka anā tsoaki ōitifishkixō, Niospa ato omiskōimatiroma.

² Askata ē ōia fakafā feroikima raka chiya osia keskara. Nāno yorafā rasi niafo ika. Nā yorafāfekai yoinā pōfe keskara ifofaafoma; āfe nimofori ifofaafoma; āfe numerori āto yoraki keneafoma. Nāfāfe ato finōkōiafo. Nā fakafā feroikima raka chiya osia keskara a kesemē maniafo. Epa Nios ato tii maneti ināpakea. Nā maneti āfe ane arpa.

³ Taeyoi Nios yonoxomiskōi Moisés ipaoni. Nā Moisés āfe rāfifo finōkōiax fanāini keskara nāskarifiai āto arpa tsomakaxō Jesús shinākakī fanāikani a Moisés fanāini keskara iskafakakī:

Ifo, mīfi Nioski. Mī afama mīshti atiro. Mī amis keskara sharakōi. Tsoa fētsakai atiroma. Mī mai fetsa anoafori keyokōiōnoax mī āto xanīfokōi ipanaka. Mī shināmis keskara mēstekōi ikōina.

⁴ Ifo, keyokōi mikiki mesekakī mia nikasharapainōfo. Mī afama mīshti tsōa ōiyomisma mī atiro. Keyokōi maitio anoafāfe anori yoipakexanōfo. Mī fistichikai afaa chakafamisma. Mī shara fisti famis. Afetīara mī ato apaiyaitīa mī ato omiskōimaxii a chakafamisfo. Chanīmakōi mī ato askafaxii. Keyokōichi mā fēkaxō mia shinākani inimayanā fanāikani, ixō yoiaifāfe ē nika.

⁵ Askata afianã ã õia nai mēranoa Nios ika ano. Ea fēpexona Nios ika ano ã õinõ.

⁶ Nios ika mēranoax ãfe ãjiri siete ichanãfo. Rapati oxokõ chainipa choshtama fafeai safeafo, oro õshi keskarato xonexemeafo. Nãfãfe mai anoafato ato omiskõimakani omiskõinõfo.

⁷ Nãskakẽ nã cuatro Niospa onifaa fētsa Niospa ãfe ãjiri sietefo ato oro kecho inãakea. Nios nã nipanakato nã Ifofaafoma mai anoafoki õitifishkikõikĩ nã kechofo mēra afara chakafo fospi faa nãskaxõ chipo atoki ãjirifãfe nachiakeaifono omiskõinõfo.

⁸ Nios ika mēra kõinĩfã nashfiar keskara. Niospa ãfe kerex shara a mēra fospi. Nãskatari a mēraxõ chaxasharai. Akka mai anoxõ nã Nios nikakaspamisfo Niospa ãjirifãfe ato omiskõimakani omiskõinõfo. Nãskakẽ a ato omiskõimanai xateamano tsoa Nios ika ano ikitirofoma.

16

Nikayospafo Niospa ato omiskõimani omiskõinõfo

¹ Askata Nios ika ariax fãsi mekaito ã nika. Niospa ãjirifo siete ato yoia iskafakĩ: “Niospa a nikakaspamisfo mai ano ikafo atoki õitifishkikĩ nã kechofo mēra afara chakafo fospi faa atoki nachitakãfe,” ixõ ato yoia.

² Nikakaxõ Niospa ãjiri fētsa taefakĩ ãfe kecho mēranoa nai mēraxõ mai ano nachia. Nãskatari nã yoinã põfe keskarato ãfe ane ãto mēkeki keneyamãkĩ ãto femãnãki keneafo, ãfe nimofõ keskarari ifofaafõ nãfo kooyoi fetsekaxõ paekõ meexikani.

³ Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

⁴ Askata afianā Niospa ājiri fētsa āfe kecho mēranoa nai mēraxō fakafoki nachia, askatari mai mēranoax faka tsekeaifokiri nachia. Nachiaino fakafō fe mai mēranoax faka tsekeaifo fe imi keskara osiafo.

⁵⁻⁶ Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tsoa onifataima mī iyopaoni. Nāskakē nā mī iyopaoni keskarari iskaratīari mī nīpanaka. Mī shara fisti amis. Aicho, iskaratīa nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisfori nā Jesús Ifofaafāfema ato reteafō. Nāskakē nā mia Ifofaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifofaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

⁷ Askatari Nios nai mēra ika anoa nā kīfiti ano fistixō Epa Nios kīfimisfo anoa ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

⁸ Askata Niospa ājiri fētsa Nios ika arixō āfe kecho mēranoa afara chaka xiniki nachia. Akiki nachiano xini chii keskara ikano yorafo koofafo.

⁹ Xini xanakōiaino yorafo koofafo. Kookani omiskōiafo. Mā tāpiyomisfo Niospa ato

omiskōimafiaino āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiāfo. “Nios shara. Afama mīshti fatiro,” ixōkai tsōa anori yoipaikanima.

¹⁰ Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara chakakōikī afe ikafokiri atoki nachia. Nachiano nā yoinā pōfe keskara ifofaāfo ika ano fakishkōi ika. Nāskakē keyokōichi paekōi meāfo, aripe iyanā.

¹¹ Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

¹² Askatari anā Niospa ājiri fētsari nai mēraxō āfe kecho mēranoa faka efapa āfe ane Eufrates kamaki nachia. Mā nachiano nā Eufrates netsorisatana. Nāskakē xanīfofo xini oaikirinoax fekani, mā Eufrates netsokōiano, āto sorarofa feta pokeferakani.

¹³ Askatari ē niafaka chakakōifo tres fexko keskara ē ōia. Fetsa ronōfā keskara nā Satanās āfe āxfa mēranoax kāikaina, fetsari nā yoinā pōfe keskarato āfe āxfa mēranoax kāikaina, fetsari: “Ē Niospa meka ē mato yoimisra,” iki, a chanīmisto āfe āxfa mēranoax kāikaina.

¹⁴ Nā tres niafaka chakafāfe tsōa afaa ōiyomisma keskara afama mīshti yorafo ispafo. Keyokōi xanīfofo a ano fokani ato ichanāfanō nōko Ifo Jesús afe yorafo retenōfo. Nāskatari nōko Niospa afama mīshti famisto afe yorafo ispaxii.

¹⁵ Askatari nōko Ifo Jesús ato yoiāito ē nika iskafakī ato yoiā: “Ea nikakāfe. Yometso tsōa yoiyamano koshikōi pexe mēra ikirisatiro afara onexikī. Nāskarifikakī ē tsoa tāpimanima nā ē matoki nokoaitā. Ē matoki samamashta nokori-

sai. Mā itipinīsharakaxō ea manasharakanax in-
imasharaxikani. Akka tsoa itipinīsharayamano
ē matoki nokoaitīa keyokōi yorafāfe ea ōikani
afāfekai ea Ifofasharama. Nāskakē rāfikōitirofo,” ixō
yoia.

16 Nānori nōko Ifo Jesús yoifiano nā tres ni-
afaka chakafāfe keyokōi xanīfofo maifo tii anoafō
ichanāfaa Niospa yorafo retēpaikī. Ato ichanāfai
nā mai āfe ane israelifāfe mekapa Armagedón
famisfo anoxō.

17 Askata Niospa ājjiri fētsa anā nai mēraxō āfe
kecho mēranoa nachia. Mā nachiano Epa Nios
meka fāsikōi iskai: “Mē keyokōi aka,” ixō yoiaito
ē nika.

18 Askatari fāsikōi kana piishikai ita, afarafo
pachakōifo ita, nai tiri iki ikai ita, mai naya naya
ita, askarafokai tsōa ōiyomisma. Nā feronāfake oni-
fakī taefanitīa tsōa mai naya naya iki finakōiaito
askara tsōa ōiyomisma.

19 Akka nā Babilonia anoax mai naya naya
ikaino mai tres kaxketani. Maifo tii anoari āto
pexe rasi nā mai naya naya ikaino maokomea.
Nā Babilonia anoafō anā Niospa shināni afara
chakafamisfono. Nāskakē atoki ōitifishkikōikī ato
omiskōimani omiskōinōfo.

20 Nāskatari nā mai toomāfā anoafō yamarisa-
tana. Keyokōi māchifāfori yamarisatana.

21 Nāskatari oi nami matsi tokorofo efapakōi āfe
efe cincuenta kilo nai mēranoax yorafoki pakea.
Askafiaito ōikakī āto chaka xateafoma. “Nios
chakakōi. Na oi nami efapakōi nokoki potai,” ixō
yoiaifāfe ē nika.

17

Mai fetsa anoafo kēro feroma keskarafa

¹ Askata anā ēfe namapa ē ōia. Afara afeskara ixiai keskara anā ea ōimana. Nā Niospa ājiri sietepa kecho tsomafo ikafo akka fistichi ea yoia: “Niri ofe. Na pexe ichapa rasi fakafāfo chaimashta anoafo chakakōifo. Kēro feromakōi keskarafa Nios nikakaspakani.

² Akka keyokōi xanīfofo maifo tii anoafo ato fe chaka imisfo. Nāskakē atoōnoax afori chakakōifo ikafo. Nā kēro feromakōi keskara ikafo chakafakani. Akka nā Niospa ato omiskōimaxiai keskara ē mia ōimanō,” ixō ea yoia.

³ Ea askafaino ē anā namakē ōia keskara ē ōia. Epa Niospa Yōshi Sharaōxō ājirinī ea iyoa tsōa istoma ano ea iyoa. Nānoa kēro ē ōia yoinā pōfe ōshikōi kamaki tsaokē. Nā yoinā pōfekōi āfe yora tiixō ane ichapato kenea ika. Keyokōi nā anefo kenekī Nios mekafakī chakafaa. Nā yoinā pōfe āfe mapo sieteya. Āfe māxo diezya.

⁴ Nā kēromā sama chainipa yafi nana ōshi safea ika. Oro fakka fakka ikai keskara safea. Askatari makex keskara fakka fakka ikai sharashta yafi fetsa āfe ane perla oxoshara, nāri safea ika. Nā kēromā kecho oro tsoma a mēra afara chakakōi naneato, a mēra nanea keskara yorafo afara chakakōi fetsa fetsatapafo chakafama. Āto mēra nanexō ato afara chaka shināmana. Ato pāemata, chanīmis ato imata, āto āfima chotamisfo ato imata, āto fenema chotamamisfo ato imata, nāskara chakakōifos ato imamis.

⁵ Āfe femānāki kenea keskara tsōa tāpimisma. Iskara kenea: “Babilonia anoafo tsoa keskarafoma. Nā kēro feromakōichi Nios

nikakaspai keskarafō. Nāskakē fetsa fetsatapafō chakafakī finakōimisfo,” ixō kenea.

⁶ Nā kēro feroma keskarato Jesús chanīmara faifo ichapakōi ato retea inimayanā. Nāskaito ōikī tāpia. “Choo, na kēromātsi ato retemiski,” ixō ē shinā.

⁷ Ē askaito Niospa ājirinī ea iskafaa: “¿Afeskai mī ratemetsamaimē? Ē mia yoinō, ea nikapo. Na kēro yafi nā yoinā keskaraōnoa ē mia yoinō. Na yoinā pōfe keskara siete mapoya askatari diez māxoya tsōakai askara tāpiyomisma. Akka iskaratīa ē mia tāpimani.

⁸ Nā yoinā pōfe mī ōiai yoinākōima. Nāfi xanīfo efapa chakakōi. Nāato Nios nikakaspamis. Taeyoi niyopaoni. Anā iskaratīa niama. Askafiax chipo nā niafaka chakafō kinīfā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax faki kanakama. Akka nā taefakī mai onifakī taefanitīa yorafāfe āto anefo Niospa āfe kirika keneni, nāfo afe ipanakafo. Akka a āfe kirikaki āto anefo keneama, afo Nios fe ipanakafoma. Nāfāfe yoixikani iskafakakī: ‘¡Kee, ōikapo! Mā nafianixakī afianā mā otoa,’ ixō yoixikani.

⁹ “Akka fētsa Niosxō mēstekōi shinākī nāato nā ē rama kenea keskara tāpitiro. Nā yoinā pōfeōnoa ē mato yoinō, ea nikasharakāfe. Āfe mapo siete mapokōima. Nā siete mapoxō xanīfoōnoa noko tāpimai. Nā ikafo siete māchifā. Nānori nā kēro feroma ika.

¹⁰ Cinco xanīfofo anā anoma. Mā nanifo. Fisti iskaratīa nia. Fetsari chipo ixii xanīfoi. A chipokōi xanīfoxiāi xanīfoi chaima.

¹¹ Nā yoinā pōfe keskara ōshi ē mia yoia,

ari yoinākōima, xanīfo chaka fetsa. Nā xanīfo siete ipaonifo keskara nāri chakakōi. A iyoaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafoma.

¹² “Askatari nā māxo diez mī ōiai māxokōima. Nāōxō diez xanīfofo noko tāpimani. Nāfo xanīfofo iyoafoma. Chipō mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafikanax xanīfoi chai samaraka kanima.

¹³ Nāskakē nā diez xanīfofofāfe shināmisfo: ‘Na yoinā pōfe keskara nōko xanīfo iki kiki,’ ixō shinākani. Nāskakē, ‘Mī noko yoiai keskara nō atiro,’ ixō nā diez xanīfofofāfe nā feronāfake yoinā pōfe keskara yoikani.

¹⁴ Nāskaxō nā feronāfake yoinā pōfe keskarato nōko Ifo Jesús afe yorafoya noikaspai, xanīfofo fetsafāferi ato noikaspaxikani. Nā yoinā pōfe keskarato nā diez xanīfofo feta Jesús yafi afe yorafo retepaikani. Retemapai fiaifono Jesús ato kanāxii. Niospa ato katoa afe yorafo kena a Ifofamisfo. Nāfāfe afara afeskarafiaito nōko Ifo kachikiri famisfoma. Nōko Ifo Jesús xanīfo fetsafori ato ikitiro. Nōko Ifo finakōixō keyokōi ato ikitiro. Akka tsōakai nōko Ifo Jesús finōtiriroma,” ixō nā Niospa ājirinī ea yoia.

¹⁵ Askano afianā ea yoia iskafakī: “Na mī ōiai nā kēro feromakōi keskara, fakafā femākīa tsaoa nā fakafākai fakafākōima, askatari yorafo mai fetsa anoafō, meka fetsayafō.

¹⁶ Nā diez xanīfofo feta nā xanīfo yoinā pōfe keskarato nā kēro feroma keskarakaxō noikas-pakōixikani. Keyokōichi āfe afara fīaxikani anā

aya inōma. Nāskakē anā tsoa nā kēro feroma keskara fe ipaikanima. Poomānā retexō koshi pikī keyotiro. Nāskafakīri nā diez xanīfofo feta nā xanīfo yoinā pōfe keskarato nā kēro feromakōi keskara chakafaxikani omiskōimayanā. Askafaxō chīi koofaxikani anā ninōma.

¹⁷ ‘Mī noko yoiai keskara nō atiro,’ ixō nā diez xanīfofofāfe xanīfo yoinā pōfe keskara yoikani. Akka Niospa anori ato shināmana a apaiyai keskara fanōfo. Askata taeyoi Niospa yoiyoni nā inōpokoai keskara nāskarakōi ixii.

¹⁸ Na kēro feromakōi keskara mā ōiai kērokōima, akka nā pexefā rasi Babilonia keskara. Babilonia anoa yorafo chakakōifo. Nāfāfe manifo tii anoa ato ĩkināno ato chakafakani ato keskara ikaxō,” ixō Niospa ājirinī ea yoia.

18

Ājiri fētsa yoia iskafakī: “Iskaratīa Babilonia pexe rasi mā keyoa,” ixō yoia

¹ Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fētsari afama mīshti atiro. Nāato chaxaito maifo tii anoxō ōikani.

² Fāsikōi yoia iskafakī:

Pexefā rasi Babilonia anoafō mā keyoa, anā anoma. Iskaratīa anā ano tsoa ikama, askatamaroko niafaka yōshi chakakōifo ano ika, askatari peya yōshi chakakōifori ano ika.

³ Nā kēro chakapa yorafo ato māmā pae ayamatiro keskafakī, nāskarifiakī nā Babilonia anoafāfe yora fetsafo mai fetsa anoafō ato afara chakafamafo ato keskara inōfo. Āto xanīfofori ato

askafamafo. Askatari afara sharafos fichipaimisfo. Nāskakē a afama mīshtifo ato minimisfo, afara ichapayakōifo, ixō yoiaito ē nika. Niospa inapa askara ato yoia a Niospa keyoxiai a Babilonia anoafō.

⁴⁻⁸ Yoikī askafatanaino nai mēranoax mekaito ē meka fetsa nika iskai mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaifāfe. Nāskakē ato omiskōimaxii. Nā Babilonia anoafāfe fetsafo afara chakafamamisfono afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fetsafori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara. Nōkai oa kēro ifomafa keskarama. Nō omiskōitiroma. Askatamaroko nō isharapakenaka,” ixō kakapaimisfāfe yoimisfo. Akka Epa Niospa ato fāsi omiskōimani omiskōikakī tenēnōfoma. Akka nā ea chanīmara faafāfe, ea nikasharakāfe. Epa Niospa mā ato samamashta omiskōimani anā isharayamanōfo. Atiri ē ato namai, atiri ē ato omiskōimani, a piaifori ato kēyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atiroma keskara Epa Niospa afama mīshti atiro. Nāskakē Epa Niospa mato yoi iskafakī: “Efe yora mīshtichi, Babilonia anoafō keskara iyamakāfe. Ato fe rafeyamakāfe. Ato feta chakafayamakāfe ē ato omiskōimanai keskafakī, matori ē omiskōimanōma,” ixō Epa Niospa ato yoixii kiki,

ājirinī faito ē nika.

⁹ Askano Babilonia kooaino mai fetsa anoafāfe

ãto xanĩfofofãfe õikakĩ manoxikani. Nãfãferi Babilonia anoxõ afara chakafakĩ tãpinifo. Nãskakẽ ato feta Epa Nios chakafakĩ potakani afara chakafaxikakĩ. Nã Babilonia anoa keskaraforti afãfe afama mĩshti ichapa fimisfo.

¹⁰ Babilonia kooaino nã xanĩfofo ratekõixikani chai inoaxri fetsafo mesexikani.

¡Ooa! Babilonia anoafato fato yora fetsafo keskarafoma. Mã tãpikõisharafikẽ samamashta Epa Niospa mato omiskõimani mã kooi fetsenõ. ¡Keexto! Koshikõi Babilonia mã kooi keyoa. Nõri iskayamapainõ,

ixõ shinãkani xanĩfofofãfe ratekõiyana.

¹¹ Nãskatari maifo tii anoafato ãto afama mĩshtifo minimisfo oiaxikani shinãmitsakani. “¡Ooa! Mã Babilonia kooi keyoa. Iskaratĩa anã nõko afama mĩshtifo noko tsõa fĩatiroma.

¹² Nõko oro õshishara fĩayamata, a kerexkõi fakkai fakkaisai fĩayamata, nõko tokirinĩ fakeshta fakkai fakkaisai fĩayamata, nõko tokiri fetsa ãfe ane perla fĩayamata, nõko sama sharafinakõia fĩayamata, nõko sama nana shara fĩayamata, sama fetsa fetsatapafõ fĩayamata, nõko ifi nakas sharakõi fetsa fetsatapafõ fĩayamata, tokiri keskara kerexkõi oxosharakõi ãfe ane mãrfil nãato afarafo onifaa fĩayamata, afe keskarara ifi sharakõifo fĩayamata, firo shara ãfe ane bronze fĩayamata, keno fetsa ãfe ane firo fĩayamata, tokiri ãfe ane mãmõlo fĩayamata, nãfo kopikõifo noko anã fĩakanima.

¹³ Akka nõ pĩchamis afama mĩshtifoya osixõ, nã itsa sharafoya fetsa fetsatapafõya osixõ, afo noko tsõa fĩatiroma. Askatari a nakas shara ãfe ane incienso, fetsari mĩrra, fetsari pirofomã, fetsari vinõ, fetsari xini, fetsari arinã, fetsari trigo, askatari

nōko yoinā inafari ovejari, kamayori, nōko karori, yonomatifori, nāfo noko anā tsōa fīatiroma.

¹⁴ ¡Ooa! Babilonia anofāfe nā afara fetsa fet-satapafo fichipaikakī anā fitirofoma. Keyokōi afara sharafo fichipaikakī mā fimis anā anoma mā fenokōia anā mā fipanā. Mā afaa yopakima mā fimis. Mākai anā fitiroma. Keyokōi nā mātonā mā keyoa,” ixō nā ināmitsamisfāfe yoixikani.

¹⁵ Nā mai fetsa anoa fēkaxō afama mīshti minikaxō kori ichapa fimisfāfe mā noko kaxō chaima nīxō ato ōikani, ratekōiyanā, oiakani, askatari shināmitsakōikani.

¹⁶ Yoikī iskafaxikani: “¡Ooa! Fato fetsakai Babilonia anoafō keskarama. Ato fe yorafāfe rapati sharakōifo safeafo. Rapati ōshi sharafo, askatari oro teoti safeafo, tokiri fakkai fakkaisai keskarari menexemeafo, perlari askari faafo.

¹⁷⁻¹⁹ Koshikōi na afama mīshtisharafo mā keyokōia,” ixō yoixikani.

Nāskarifiāi nā kanōanāfā āfe ifofāfe shinākani, a kanōanāfā mēra fomisfāferi shinākani, a kanōanāfā nexa yonomisfāferi shinākani, a kanōanāfā mēra fokaxō, ato afama mīshti minikaxō kori fimisfāferi shinākōikani. Babilonia kooaito chai ixō ōikani manokakī shināxikani. “¡Ooa! Fato pexe fet-sakai Babilonia keskarama. Na Babilonia fistiōxō kanōanāfānē āfe ifofāfe kori ichapa fimisfo. Akka a aya imisfo koshikōi mā keyoa,” ixō a kanōanāfāō yonomisfāfe yoixikani.

²⁰ Askaifono keyokōi Epa Nios ika anoafō inimakāfe. Babilonia anoafāfe a Jesús chanīmara faafo ato omiskōimamisfo, Epa Niospa ato kopikī omiskōimaxii. Nāskakē keyokōi a Jesús chanīmara

faafo fe, Jesúsxõ äfe meka yoipaonifo fe, a Niospa meka inõpokoai yoimisfori inimakãfe.

²¹ Akka Epa Niospa äfe äjiri fetsa mitsisipakõichi tokiri efapakõi fininĩfofãta fakafã mēra potaxõ yoia iskafakĩ: “Na tokiri kerexkai ẽ potai keskafakĩ, nãskafakĩri Epa Niospa na pexe rasi anoafõ Babilonia kerexkai omiskõimana kooi keyonõ. Mã keyokõikanax anã ano tsoa ikima.

²² Nãskakē anã Babilonia anoax manetifo, xãitifo, maneti fetsafori, afo anã tooxikama. Askatari anã tsoa fanãikama. Tsõakai anã ato nikatirofoma. Askatari a yonomisfo anã ano ikafoma. Askatari a aõ xiki reneaifo nõ anã nikatiroma.

²³ Anã luzri õtapakenakama. Feronãfãke kēro fiaino inimaifãfe mã nikamis keskara anã tsoa askara mã nikapakenakama. Babilonia ano a inãmitsamisfãfe tãpikõikani. Nãfãfe ichapakõi fimisfo. Askatari koshoiti tãpixõ yora fetsafo pãramisfo. Askafikanax mã keyoafõ.

²⁴ “Babilonia anoafãfe a Niospa meka yoimisfo, fetsafori a Jesús chanĩmara faafo, fetsafori mai fetsa anoafõ ato retemisfo Jesús õikaspakakĩ. Niospa meka mato yoipaiifaifono mã ato nikakaspamiskē, Niospa mato omiskõimana,” ixõ Niospa äjirinĩ yoia.

19

Nios ika anoax fanãiki iskakani: “¡Aicho! Nõko Ifo Nios sharakõi,” ikaxõ Niosnoa afara sharafo fanãikani

¹⁻² Askata nai mēra ikafo ichapakõi ãto meka ẽ nika, fãsikõi iskaifãfe:

A fetsafãfe chakafamisfo Epa Niospa ato omiskõimani. Chanĩmakõi, ato omiskõimani. ¡Aicho! Nõko Ifo Nios fãsi sharakõi. Nãato nõko chaka noko soaxona nõ afe nĩpaxanõ. Aõnoa fisti nõ yoitiro iskafakĩ: “Mĩ nõko Ifokõi. Fato fetsakai mia keskarama afara sharafamis. Mĩ sharaõxõ mĩ afama mĩshti fatiro,” ixõ keyokõichi yoipakenakafo. Epa Niospa Babilonia anoafõ atoõnoa iskafakĩ yoia: “Nã Babilonia anoafõ nã kẽro feromakõi keskarafo. Nã chakafamisfoõxõ maifo tii ano ikafori ato chakafama. Nãskakẽ Babilonia anoafãfe ea fãsi chakakõi famisfo. Efe yorafori ato omiskõimakani nanõfo. Nãskakẽ ẽ ato kopia omiskõimakĩ,” ixõ Epa Niospa yoi,

ixõ yoiaifãfe ẽ nika.

³ Afianã meka fetsari ẽ nika nai mẽranoafãfe yoiaifãfe iskafakakĩ:

¡Aicho! Nõko Ifo fãsi sharakõi. Afaa chakafamisma. A chakafamisfo chanĩmakõi ato omiskõimani. Ato chiifã mẽra potano afo kooi nishpapakenakafoma,

ixõ yoiaifãfe ẽ nika.

⁴ Askanori Epa Nios tsaoa ano nã veinticuatro xanĩfori nã Nios onifani cuatro a nãmã feopakekafakĩ iskafakĩ yoiafo: “Askapainõ. ¡Aicho! ¡Nõko Ifo fãsi sharakõi!” ixõ yoiaifãfe ẽ nika.

⁵ Askata Epa Nios tsaoa anoa ẽ meka fetsa nika iskafakĩ yoiaito:

Epa Nios yonoxomisfãfe xanĩfofõfãfe askatari afamafõfãfe mato Niospa yoia keskara mã apaikõimis. Mãri Epa Nios yoikãfe iskafakĩ: “¡Aicho! ¡Epa Niosi, mĩ sharafinakõia!”

ixõ yoiaito ẽ nika.

Feronāfake āfiyakī fista atiro inimakī. Nāskarifikī Jesús nai mēraxō noko fista axoxii nokoki inimakī

⁶ Askatari ē anā nika yōrafā rasi mekaifāfe nā fakafā poo ikai keskara, askatari fāsikōi nai tiri ikai keskarari ē nika āto meka:

¡Aleluya! Nōko Ifo Nios tsōa atiroma keskara afama mīshti fatiro. Nā nōko Xanīfo finakōia. Maifo tii anoafo noko ĩkitiro. ¡Aicho! ¡Nōko Ifo Nios sharafinakōia!

⁷⁻⁸ Akka feronāfāke kēro fiaino nā kēro inimakōi itipinīsharatiro āfe fene fe fianāxiki. Nāskarifiāi nōko Ifo Jesús fe iskaratīa afe yorafo afe ipanakafo. Akka afe yorafo mā itipinīsharafo afe ipaxakakī. Akka āfinī āfe fene inimamapai itipinīsharatiro. Sama fena sharakōi patsaxō safetiro afe fianāxikī. Nāskarifiakī nā Jesús Ifofamisfāfe itipinīshara fatirofo. Epa Niospa ato shara fapaikī, ato chaka soaxoni Jesús fe ĩpaxanōfo. Nāskakē nō inimai. Tsoa fetsakai mia keskarama afara shara famis, ixō yoiafo. Niospa yorafāfe Jesúsxō fetsafo sharafamis. Nāskakē Niospa ato rapati sharafinakōi safemana Jesús fe ipasharanōfo.

⁹ Askatari ājirinī ea yoia: “Ē mia yoiai keskara kenefe iskafakī: ‘Ēfe Fake Jesús iskaratīa keyokōi afe yorafo ichanāfai afe ĩpaxanōfo. “Niri fekāfe,” ato faino, nikakanax inimakōikani. Nāskakaxō ēfe Fake feta pikani afe ipaxakakī,’ ixō Epa Niospa yoia. Nāskakē Epa Nios āfe meka mā chanīmara fatiro,” ixō ea yoia.

¹⁰ Ea yoiaino ē a nāmā feopakekafana, “Mī fāsi sharakōi,” ixō yoixiki. Ē askafaino ea yoia iskafakī:

“Ea askafayamafe. Ĕri Nios yonoxomiski mĩ axomis keskafakĩ, a Nios Ifofaa fetsafãferi askafamisfokĩ. Jesũs mato yoiai keskara mĩ kachikiri famisma. Nãskakẽ Nios fisti nãmã nõ feopakekafã yoitiro: ‘Mĩ fãsi sharakõi. Mĩ ěfe Ifokõi,’ ixõ anori fisti nõ yoitiro. Nã Niospa meka yoimisfãfe yoimisfo keskarifikĩ ěri Jesũsnoa yoimis Epa Niospa ea shinãmanaino,” ixõ ģjirinĩ ea yoia.

Jesũs mai ano afianã oxiai keskara yoi

¹¹ Akka ě anã ěfe namapa õia keskara anã ě mato yoinõ mĩ tãpinõ. Epa Nios ika anoa nai mĕranoa ě õia. Fepoti fepekemea keskara ě a mĕra õia. Nãskara Epa Nios ika ari xafakĩakõi ě õia. Nãno kamayo oxokõi ě õia. Nã kamayo kamaki Jesucristo nõko Ifo tsaõa. Āfe ane ichapa. Āfe ane rafeõnoa ě mato yoinõ. Fĕtsa, “Nã Yoia Keskara Akõimis.” Akka Āfe ane fetsari, “Chanĩmismã.” Nãato chanĩmakõi yora chakafo omiskõimani. Niospa meka nikakaspamisfono a omiskõipakenakafo mĕra ato potaxii.

¹² Āfe fero rafe chii xofisai keskara. Fakishi chii xofisaino yõra õisharatiro. Nãskarifikĩ nõko Ifãfe yorafãfe ģto õiti mĕraxõ shinãifo keskara tãpia. Xanĩfãfe maiti sharakõifo ichapakõi maiãfo ika. Āfe femãnãki Āfe ane kenea. Ares fisti nã ane tãpia.

¹³ Rapati chainipa safea. Nã rapati imiki momoa. Nãskara õikĩ ea shinãmana Jesũs noko nãxoni. Āfe ane fetsari, “Niospa Meka,” famisfo.

¹⁴ Afe yorafo nai ariax kamayofõ oxokõi kamaki ģto Ifo kachiori fokani. Āto rapatifo oxokõi chainipa safeafo. Nã rapati oxokõi rama pãtsaxona keskarafo.

15 Āfe axfa mēranoa keno chainipa ikiaikōi ē ōia. Akka āfe kenoma, āfe meka. Āfe mekapas maifo tii anoafō nikayospamisfo omiskōimani. Maifo tii ato īkinā, fetsafo nikayospamisfo ato kerexkai omiskōimakōi. Āfe meka nikakaspamisfono Nios ōitifishkikōini. Akka Jesúsxō ato omiskōimani, omiskōipakenakafo mēra ato potaxii.

16 Jesús āfe ane fetsa āfe rapati chainipaki kenea mǎnākiri keneta maikiriri kenea iskafakī: “Xanīfo maifo tii anoafō Xanīfo finakōia, askatari āto Ifo finakōia,” ixō kenea.

17-18 Askatari ē ōia ājiri fetsa xini ano nīxō fāsikōi yoia iskafakī: “Xanīfofo ikaino, sorarofō āto xanīfofo ikaino, āto xanīfofo fe rafea ikaino, feronāfakefo mitsisipafo ikaino, kamayofō ikaino, a kamayofō kamaki tsaoafō ikaino, keyokōi Niospa meka nikakaspamisfo ikaino, ato yonomatifoma ikaino, a āto yonomatifo ikaino, yora afamafori ikaino, a yora finakōiafo ikaino, keyokōi Niospa ato namaxii,” ixō yoia. Nāskakē ishpfifo ato yoia: “Fekāfe āto nami pixikakī,” ixō nā ājirinī ishpfifo kena.

19 Askatari afianā ē ōia a nōko Ifo Jesús noikaspai nā yoinā pōfe keskara yafi maifo tii anoafō xanīfofo āfe sorarofoya ēfe namapa ōia keskara ē ōia. Mā ichanāfo Jesús āfe kamayo kamaki tsaokē afe yorafoya retepaikani.

20 Akka ato retetamaroko Jesús ato achia chiifā mēra ato potaxiki. Nā ato pāramisto, “Ē Niospa meka mato yoimis,” ifiax āa chanīmis. Nāato na yoinā pōfe keskaraōxō tsōa atiroma keskara famis Satanās yōshixō. Nāskaxō keyokōi yorafoki kenea nā marakkaōxō yoinā pōfe keskara tāpixikani.

Nãfãfe yoimisfo iskafakakĩ: “Mĩ ěfe nios. Ě mia noi,” ixõ anori yoinã põfe keskara yoimisfo. Akka nã ato pãramisto yõra atiroma keskafakĩ afama mĩshti faito nãfãfe õiafo. Nãskakẽ ato pãrakõia. Nã yoinã põfe keskara fe nã ato pãramis naafomano iriyafi Jesús ato chiifã mẽra pota.

²¹ Nã rafeta ãto inafõ Jesús ãfe kamayo kamaki tsoaxõ ãfe mekapa ato reteaino nai fetseafõ. Mã naafono ishpfifo atoki ichanãkaxõ ãto nami pikani mãyakõiafo.

20

Jesús Satanás achixõ nexaxii mil xinia

¹ Askata Niospa ãjiri Nios ika ariax fotoaito ě õia, chamis keskara tsoma. Nã niafaka chakafo kinĩfã fakishifã mẽra ikafoki atoki fepoti fepoa keskara ě õia. Nã Niospa ãfe ãjirinĩ fepotinĩ ãfe chamis yafi kaninã efapa tsoma ika.

² Tsomaxõ nã ronõfã keskara achia. Nã ronõfã keskara nã niafaka chakakõi Satanás. Nã achixõ nexa.

³ Nãskaxõ kinĩfã fakishifã mẽra pota. Potata akiki fepokõia mil xinia a mẽra inõ anã yorafo pãranõma. Mã mil xinia finõano afianã kãimayoxii samarakatama chaimashta anã mai ano kafãsayonõ.

⁴ Askata xanĩfãfe tsaotifo Epa Nios ika anoa ě õia. Jesús afe yorafo yoia nã tsaoti kamaki tsoafono, “Mã yoitiro fatofomãkĩ omiskõipakenakafo mẽra foaifoma, akka fatoforimãkĩ a omiskõipakenakafo mẽra foaifo.” Askano nãnoari ě õia nã Jesús chanĩmara faafo yamĩ ato textenifo. Ato texteyoafomano yoiyopaonifo: “Jesús nõko Ifo,”

fayopaonifo. Niospa meka ifofamisfono, nāskakē ato textenifo. Akka nāfāfekai nā yoinā pōfe keskara yafi āfe nimofa yoimisfoma iskafakakī: “Mī nōko ifo nios. Nō mia noi,” ixōkai anori yoimisfoma. Askatari aō ato tāpinōfo āto mēke yafi āto femānā kenemisfoma. Nāskakē nā yoinā pōfe keskara atoki ōitifishkikī ato textemani. Mā nai fetsefiafono Jesús ato otoani. Mā otokaxō Jesús feta maifo tii anoafu mil xinia yorafo tii ato īkināfo.

⁵ Nāfo mā otoafono mā mil xinia keyoano fet-safori Epa Niospa ato otoaxii.

⁶ Shinākapo efe yora mīshtichi, mato yoiai keskara. Noko Epa Niospa otokakī taefaxii. Noko katoni afe yorafo nō inō. Epa Nios feta Cristo noko yoiai keskara nō fetsafo Epa Nios kīfixomis. Nō omiskōifikatsaxakī Jesúsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō īkixii. Nāskakē Jesús keskara shara ikax nō fāsi inimaxii.

Satanás kinīfā chaikōi mēranoa kāimayoi anā yorafo pāranō. Ato askafaino koshikōi anā kinīfā mēra potaxii anā kāipakexanōma

⁷⁻⁸ Askata mā mil xinia finōano Satanás kinīfā fakishifā mēranoa anā kāimayoxii anā maifo tii anoafu ato pārayonō. Askata mā kāixō nā Nios nikakaspaifo maifo tii anoafu ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo.

⁹ Maifo tii anoafu ato ichanāfaxii Niospa yorafo ikafo anoafu ato cheteakenōfo ato retexikakī. Ato

askafaifono Epa Niospa afe yorafo noikĩ ato ifixii. Nã yorafo Satanás ichanãfaa ono nai mēraxõ atoki chiifã potano nai fetsekani anã tsoa pishta ni-nakama.

¹⁰ Akka nã Satanás niafaka chakata yorafo feparamiskõikē Epa Niospa chiifã mēra pota. Nã taefakĩ nã yoinã pōfe yafi nã ē mato Niosnoa mato yoimisra iki a chanĩmis ato mērari Satanás niafaka chaka Epa Niospa pota. Nã tii chiifã mēranoax omiskõikani xatenakafoma.

Jesús chanĩmara faafoma ato omiskõimaxii

¹¹ Askata xanĩfãfe tsaoti oxokõi efaapakõi ē õia. Nãno Epa Nios tsaoa. Akka mai fe nai anã ano ikama.

¹² Askata ē õia nã xanĩfofo fe nã yora afamafori nakanax Epa Nios tsaoa ano niafo. Nãno niafono Epa Niospa ãfe kirikafo fēpea. Kirika fetsari fēpea. Nã kirikaki nã Ifofamisfo atoki kenea. Akka a Ifofamisfoma atoki keneama. Akka nã kirikanã ãfe ane Nĩpamisfo. Nã nayox-oma apaonifo keskara kirikafo mēra keyokõi Epa Niospa mã keneni. Nãskakē nã afara chakafa-paonifo keskara atoki kenexõ ato ispai tãpinõfo chanĩmakõi ato omiskõimaxii.

¹³ Nã ãsamisfo fe mai anoax namisfori askatari fetsafori nafiakanax otoyokanima keyokõi namisfo Epa Nios ãfe ferotaifi feafo. Nã chakafamisfo tii Epa Niospa ato omiskõimapakea.

¹⁴ Keyokõi nã Niospa meka nikakaspamisfo Epa Niospa ato chiifã mēra pota. Mã nafianifono iskaratĩa afianã ato chiifã mēra potaito ē õia. Nãnoax omiskõikani xatepakenakafoma.

¹⁵ Akka nã kirika ãfe ane “Nĩpamisfo” a mēra Epa Niospa ãto ane kenemisma, nãfo chiifã mēra pota. Nãskara ě ōia Epa Niospa ea ōimanaino a ixiai keskara mai keyoaino.

21

Nai yafi mai fenakōi Epa Niospa onifaxii

¹ Akka nã ěfe namapa ōia keskara Epa Niospa anã ea ōimana. Ě ōia nai yafi mai fenakōi Niospa onifaa. Nã nai yafi mai taefakĩ onifani yamarisatana. Fakafãri yamarisatana.

² Askano ě ōia Niospa yorafo nãfãfe Jesús Ifo shara famisfo nai mēranoafo Epa Nios ika ariax fotokani. Nãfo ikafo Jerusalén fena ano. Nã Jerusalén fena Nios ika ariax nãmã fotoa nãno ikafo. Fotoaifono ě ōia fãsi sharakōi. Akka kēromã ãfe sama sharakōi safetiro itipinĩsharaxikĩ fene fe fianãxiki. Nãskari fakĩ Epa Niospa nã Jerusalén fena itipinĩshara faa sharakōi inō afe yorafo nãno afe nĩpaxanōfo.

³ Askano Epa Nios tsoa ano meka achakōi ě nika. Yoia iskafakĩ: “¡Aicho! Iskaratĩa Epa Nios yorafo fe ixikiki. Ato mēra ixii nãfo afe yorafo inō, nã yora fisti keskara.

⁴ Ato kexesharaxii anã tsoakai omiskōitiroma. Ato noikĩ oiaifono Epa Niospa ato shinãmasharaxii ãto fēo tereaxoxii anã shinãchakakakima tanaima inimanōfo. Ato kexeaino tsoakai anã natiroma, anãrikai manomitsai oiakanima, anãrikai paemekanima. Afara chakafo iyopaoni keskarakai anã askanakama,” ixō yoia.

⁵ Askata Niospa ãfe tsaoti kamaki tsaoxō yoikĩ iskafaa: “Ě keyokōi fenafai,” ixō Niospa yoia. “Ěfe

meka chanĩmakõi. Nãskakẽ nã mĩ nikai keskara kenefe,” ixõ ea yoia.

⁶ Askaxõ anã Niospa ea yoia iskafakĩ: “Mẽ aka. Iskaratĩa ã yoiyoni keskara mẽ keyoa. Afara onifataima ã iyopaoni. Afetĩara maifo tii keyoai eres fisti ã yoitiro. Ë keyokõi ikinã. Ëfi nĩpamiski. Fetsa nõamãikĩ yoitiro iskafakĩ: ‘Ë faka fenakõi naxikima,’ ixõ yoitiro. Nãskarifiã fetsa ipaishara-paikõikĩ yoitiro iskafakĩ: ‘Ëa ã ishariatroma. Ë Nios yopakõi,’ ixõ anori yoiaito ã inimakĩ ifitiro, efe ipaxanõ.

⁷ Fẽtsa ea kachikiri fatamaroko nã naitĩa ea Ifofasharaxõ nãato keyokõi nã ã mia yoia keskara fixii. Ë kaxpa inãxii. Ë ãfe Nios ixii. Akka ãfe fake ixii.

⁸ Akka fetsa ratei eõnoax omiskõikaspakĩ ea kachikiri faa, askatari fẽtsa ãfe meka nikakaspamis, fẽtsari afara chakafo fetsa fetsatapafaxatekaspai, askatari fetsari retemitsamis, fetsari ãto ãfima chotamis, askatari kẽromãri ãto fenema chotamamis, fẽtsari koshoiti tãpiãx nã nifaka chakafo fe rafemis, askatari fẽtsari ea noitamarofo afara fetsa noikĩ, ‘Na ãfe nioski,’ famis. Nãskakẽ askarãfo fe nã chanĩmisfo afokai efe nĩpanakafoma. Chiifã mẽra nã omiskõipakenakãfo mẽra ipanakãfo. Anoaxkai faki fonakãfoma,” ixõ Epa Niospa ea yoia.

Jerusalén Fena

⁹ Askata Niospa ãjirinĩ siete kecho keskara mẽra afara chakakõi fospia maifo tii ano nachixii ato omiskõimanõ fẽtsa ekeki oxõ yoikĩ iskafaa: “¡Ofel! Ë mia afara sharakõi õimanõ. Akka feronãfãke mã

ãfiyaxõ kexesharatiro. Nãskarifikã Jesús chanĩmara faafo afe yorafo ifia. Ofe. Ë mia õïmanõ,” ea faa.

¹⁰⁻¹¹ Askano Niospa Yõshi Sharapa ea Ìkinãino Niospa ãjirinĩ ea machi efapa keyakõï ano ea iyoa keyokõï ã õinõ. Jesús chanĩmara faafo nã Nios ika anoafõ ato chaka soaxona nãfo nai mēranõ Epa Nios ika ariax fotoaifãfe ea õïmana. Na mãchifã keyakõï anoxõ ea õïmana. Nãfo ika ano ãfe ane Jerusalén Fena. A mēra ikafo Jesús Ifo shara famisfo. Epa Niosri ato fe ika. A ato fe ika ano fakkai fakkais ishara. Tokiri fakkai fakkais ikai keskara sharafinakõïa. Nã tokiri ãfe ane jaspe fēxta shara, tokiri fetsa ãfe ane cristal. Shara fakkai fakkais ikai keskara.

¹² Nã tokiri kenea efapa Jerusalén foake tii fayakena. Nã kene keyakõï doce fepotiya. Nã doce fepoti ano Niospa ãjiri niafo kexesharaxikakã. Israel iyopaonito ãfe fake doce ipaoni. Nã docefãfe ãto fakefo paxkanifo. Nãskakē fepoti tii ãto anefo doce kenea.

¹³ Nã kene keya ãfe fepoti ichapaya. Xini oakiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya.

¹⁴ Nã kene keyakõï tokiri doce efapanãfã kamaki kenea. Jesúsnoa yoimisfãfe ãto anefo nã tokiri doceki kenea.

¹⁵ Niospa ãjirinĩ nã ea taefakã yoiato, nãato tanati oro tsoma, Jerusalén Fena tanaxii, ãfe kene yafi ãfe fepoti tanaxiki. Nã tanati tafa chainipa keskarafix oro õshi keskara sharakõï.

¹⁶ Nã Jerusalén Fena ãfe kene keya senēsharakõï. Æfe chainipa fe ãfe xãkã nãtixõ rafe. Æfe keyari

nātixori. Niospa inapa tana dos mil dos cientos kilometro āfe chainipa fe, āfe xākī, āfe keyari.

¹⁷ Āfe kenefo keyakōi a akiki kenea sesenta y cuatro metros. Nā Niospa ājiri yorafāfe tanamis keskari fakī nāatori metropa tana.

¹⁸ Nā Jerusalén Fena sharakōi. Nā manishomo fēxta nō ōimis keskara sharafīax ōshi keskara. Nāōxō Epa Niospa Jerusalén Fena onifaa. Askatari a kenea keyakōi nā tokirinī āfe ane jaspe Niospa onifaa.

¹⁹ Tokiri sharakōifo fetsa fetsatapafo Epa Niospa onifaa, nā doce tokiri kamaki nā kene keya tsaoa. Taeyoi jaspeki iyoa. Āfe pefeta zafiroki ika. Āfe pefetari agataki ika, āfe pefetari esmeraldaki ika,

²⁰ āfe pefetari onīceki ika, āfe pefetari cornālināki ika, āfe pefetari crisolitoki ika, āfe pefetari beriloki ika, āfe pefetari topacioki ika, āfe pefetari criso-prasaki ika, āfe pefetari jacintoki ika, āfe pefetari amātistaki ika; nāfo sharakōifoki nā kene Epa Niospa nimainīfofāni.

²¹ Nā kene keyapa āfe fepotifo perla oxo efapa Niospa onifaa. Nā perla tokiri keskara oxo sharakōi. Nā perla fistiōxō fepoti fisti onifaa. Nāskakē doce fepoti onifaa nā perlaoxō. Nā Jerusalén Fena āfe fai manishomo fēxta sharakōi keskara oke rafe nō ōitiro. Manishomo fēxta keskara sharafīax oro ōshi keskara shara.

²² Akka Epa Nios kīfiti pexefā anoma. Epa Niospa nā afama mīshti fatiroxakī nōko Ifo Jesús noko fe Jerusalén Fena mēra imisfo. Askatari yorafāfe Epa Nios kīfiti pexefā nā anā yopanakafoma.

²³ Nāskarifikāi anā xini yafi oxe yopakanima Epa Nios fe Jesús ato fe ikano. Epa Nios nāno ato fe ixō ato chaxaxoni. Jesúsri ato askafaxōi ōisharakōinōfo. Anā afaa yopakanima.

²⁴ Mai fetsa anoaxri fofāsatirofo Epa Niospa ato chāxano. Xanīfofori Jerusalén Fena mēra ikikaxō a aya imisfo afara sharafo ināxikani.

²⁵ Nāno fakishri anā ikima. Fakishpaknakama. Akka anā Jerusalén Fena āfe fepotifo fepopaknakama.

²⁶ Akka fetsafori maifo tii anoax Jerusalén Fena mēra ikikakāi a aya imisfo ato afara sharafo ināxikani.

²⁷ Akka afara chaka nā Jerusalén Fena mēra ikitiroma. Nā chaka shināmisfo fe a afara chakafamisfo, a ato pāramisfofori afo ikitirofoma. Akka Jesús āfe kirika mēra āto ane keneano afe ipaxatirofo. Nāfo fisti Jerusalén Fena mēra ikitirofo Jesús fe ipasharaxikakāi.

22

¹⁻² Askano ēfe namapa ōiai keskara Niospa ājiri fētsa ea ōimana afe keskaramāki Nios ika ano. Nios fe Jesús tsoa anoax faka shara fakkai fakkaisai keskara kafani, fai nēxpakāi. Afara choshta a mēra ikitiroma. Nāno ikafāfe nā faka shara aya-paiyaiā ayatirofo, nāskakē nomipaknakafoma. (Nāskarifiakāi nāno Niospa noko potapaknakama noko ikipaknakama.) Nānori fai nēxpakāi ifi nia ika. Faka takai raferi nii xokoa ika. Nāno ikafāfe nā nii fimi pipaiyaiā pitirofo. Nāskakē fonāipanakafoma. Nāskarifiāi Nios nofe ikano nō aōnoax omiskōitiroma nō nisharapaknakama. Nā

ifi oxe tii fimimis. Āfe pei tsasimisma xachoko fena shara ipanaka. Nāskarifiāi nā chanīmara faafo tii maifo tii anoax Niosnoax meema sharakōi ipanakafo.

³ Nā Jerusalén Fena ano Epa Nios fe Jesús nofe ixii. Nō ato fe yorakōixō nō ato noikōixii. Nō āto yonoxomiskōi nō ixii. Atoki fanāisharayanā nō ato yoisharapakenaka. Akka nōko mai xini ano afara chaka fetsa fetsatapafa imis. Akka iskaratīa nā Jerusalén Fena ano afara chaka a mēra itiroma.

⁴ Nānoax nōko Ifo fe āfe femānāki ōinōnāfafāixikani. Āto femānāki āfe ane ato nētamana.

⁵ Nōko Ifo Nios ari ikafo ato penafaxōa. Nāskakē anā rāpari yafi xini yopatirofoma. Anokai anā fakishima. Nāskax afe xanīfo ipanakafo.

Jesús chaima oi

⁶ Askata Niospa ājirinī anā ea yoia: “Nōko Ifo Niospa āfe Yōshi Sharaōxō a āfe meka yoimisfo āto ōiti mēraxō ato tāpimamis a afara afeskara ixiai keskara afe yorafori ato tāpimanōfo. Nāskarifiakī iskaratīa āfe ājiri fetsa nīchia afara afeskara ixiai keskara a yonoxomisfo tii ato tāpimanō. Nā ē mia yoiai keskara chanīmakōi. Keyokōi ēfe meka mā chanīmara fatiro,” ixō ea yoia.

⁷ Akka yoikī iskafaa nōko Ifo Jesús yoia iskafakī: “Ē nai mēranoax mai ano matoki nokorisai. Nā mī ōia a inōpokoai a mī nikafori, nāfo mī kene-tiro. Akka nāfo chanīmara fakakī kachikiri fayamakanax inimakōixikani,” ixō Jesús ea yoia.

⁸ Ēkīa Juan ē nika, askatari ē ōia ea Niospa ājirinī ōimanaino. Nāskakē ē a nāmā feopakekafana ēfe

Ifo keskara shināi. Nāskaxō, “Mī fāsi sharakōi,” ě fakerana.

⁹ Ě askafaito ea yoia iskafakī: “Ea askafayamafe. Ěri mia keskaraki. Mī ikaino, Jesús chanīmara faafo ikaino, āfe meka yoimisfo ikaino, keyokōi nā mī rama kenea keskara chanīmara faafo fe, ěri mato keskara nōko Ifo Nios ě yonoxomis. Akka Epa Nios fisti mī Ifofatiro. Nā fisti nāmā mī feopakekafatiro,” ea faa.

¹⁰ Askata afianā ea yoia iskafakī: “Nā mī kenea oneyamafe. Nā mī kenea keskara samama askakōi. Nāskakē a mī kenea keskara keyokōi yorafāfe tāpinōfo.

¹¹ Akka mā Jesús nokoaino nā nikakaspamisfāfe chakafakī finakōixikani. Yora chakafamisfāferi nāskari faxikani chakakōi fakakī. Akka nā Niospa yoiai keskara amisfāfe nāskarakōi fakakī mimakōi faxikani Niospa yoiai keskara akakī. Nā Jesús keskara shara imisfo nāfori isharakōixikani āto Ifo ifosharakōifakani,” ixō Niospa ājirinī ea yoia.

¹² Nāskaxō Jesús anā yoia iskafakī: “Ea nikasharakāfe. Ě matoki samama nokorisai. Nokoxō ě mato yoioa keskara ě mato ināsharaxii. Nā afara shara famisfo ě ato shara fata nā afara chakafamisfo ě ato omiskōimaxii.

¹³ Afarafo onifataima ě iyopaoni. Ěfi nīpamiskī. Ě niixatepakenakama. Nā mātō mai keyoai eres fisti ě yoitiro,” ixō ea yoia.

¹⁴ Anā Jesús yoia iskafakī: “Nō Jerusalén Fena mēra ikixō, nā ifi āfe fimi pipaiyaitīa nō pitiro. Nāskarifiāi nō Epa Nios fe ikaino ares fisti noko nimapakexatiro. Nā Jesús chanīmara faafo ato

chaka soaxona nãfo fisti Epa Niospa ato ikimatiro afe ĩpaxanõfo.

15 Nãskakē nã yora chakakōi paxta pōfe keskarafõ fe, a koshoiti tãpiafo, nã koshoiti chanĩmara faifori, feronãfãke ãfe ãfima chotamis, kērofãferi ãto fenema chotamamisfo, retemitsamisfõri, Nioskōima noikĩ ifofamisfõri, chanĩmisfõri, nã chanĩ noimisfõri, askara yorafokai Jerusalén Fena mēra ikitirofoma.

16 “Ēkĩa Jesús, ěfe ãjiri matoki nĩchia ě mia yoia keskara nã ea Ifofaafõ tii ichanãfo anoxõ ato tãpimanõ. Ēkĩa David ãfe fena. Ēfi nã fishi efapa penaino õimisfo keskarakĩ. Nã fishi õikĩ nõ tãpitiro mã penaino. Nãskarifiã mē chaima oaino tãpikanax itipinĩsharatirofo Jerusalén Fena mēra efe ipaxakakĩ,” ixõ Jesús ea yoia.

17 Askano Niospa Yõshi Shara feta Jesús afe yorafãferi yoikakĩ iskafatirofo: “Jesúsiki fekãfe,” ato faifono, fetsafãferi nikakaxõ ato yoitirofo: “Jesúsiki fekãfe,” ato fatirofo. Fētsa nõamã ikĩ faka yopai, faka ano katiro mã ayax anã nõamã itiroma. Nãskarifiã fētsa ãfe chaka xatepai, Jesúsiki otiro Epa Nios fe ipaxakĩ. Afaa inãtama Jesús chanĩmara faax, afe ipaxatiro.

Juan mã mekai xatekĩ Jesús yoiai keskara keneni

18 Ēkĩa Juan, afara ixiai keskara ě mato kenexona. Ē mato kenexonai keskara chanĩmakōi. Nã meka ě mato yoiai nikasharakãfe. Ē mato kenexona keskara akka fētsa afianã meka fetsa shinãkĩ keneax, na kirika mēra kenea mã õiai keskara omiskōipakenakafo chanĩmakōi Epa Niospa keyokōi nãfo omiskōimaxii.

¹⁹ Askatari a afara afeskara ixiai keskara ã ke-
nea fẽtsa na meka atiri soakẽ Epa Niospari ãfe
ane soaxii ãfe kirika mẽranoa. Nãskakanax nã
Jerusalén Fena shara mẽra ikitirofoma. Ë kenea
keskara soakanax nã Epa Nios afara shara yoiyoni
keskara, aya ipanakafoma.

²⁰ Jesús yoia keskara nãnori ã mato kenexona.
Nãato yoikĩ iskafaa: “Chanĩma, ã matoki samama
nokorisai,” ixõ yoia. Askapainõ. Nõko Ifo Jesús
orisapainõ.

²¹ Mã Niospa yorafo. Afara afeskara afi-
aino nõko Ifo Jesús mato noixõ mãto õiti mato
fẽpeaxosharapainõ. Askapainõra. Ëri mato fãsi
shinãi. Nã ti.

Ëkã Juan

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

6c7b7ce2-9d87-5405-91e6-71ce1387adcc